

李文忠公全集

朋僚函稿

六一



李文忠公朋僚函稿

卷之十九目錄

復李丹崖星使 光緒五年九月初四日

復曾劼剛星使 光緒五年九月初五日

復李丹崖星使 光緒五年九月二十四日

復沈幼丹制軍 光緒五年十月十七日

復沈幼丹制軍 光緒五年十月二十四日

復曾劼剛星使 光緒五年十月二十四日

致曾劼剛星使 光緒五年十一月二十七日

復曾劼剛星使 光緒五年十二月初五日

復丁稚璜宮保 光緒五年十二月二十五日

復周福陔中丞 光緒五年十二月二十七日

復張幼樵侍講 光緒六年正月初三日

復譚文卿中丞 光緒六年正月初七日

復周福陔中丞 光緒六年正月十九日

復李丹崖星使 光緒六年二月二十日

復何筱宋制軍 光緒六年二月二十三日

復劉省三軍門 光緒六年二月二十六日

復丁稚璜宮保 光緒六年三月初一日

復三四兩弟 光緒六年三月初三日

復曾劼剛星使 光緒六年三月初四日

復周福陔中丞 光緒六年三月十七日

復曾劼剛星使 光緒六年三月十七日

復譚文卿中丞 光緒六年三月十八日

復黎召民京卿

光緒六年三月二十日

復陳荔秋星使

光緒六年四月初二日

復周福陔中丞

光緒六年四月初三日

復曾劼剛星使

光緒六年四月初五日

復李丹崖星使

光緒六年四月十七日

復何筱宋制軍

光緒六年五月初三日

復吳清卿節使

光緒六年六月初五日

復李丹崖星使

光緒六年六月初七日

復丁稚璜宮保

光緒六年六月十五日

復劉峴莊制軍

光緒六年七月十六日

復黎召民京卿

光緒六年七月二十一日

復張幼樵侍講

光緒六年八月初六日

復李丹崖星使

光緒六年八月十七日

復劉峴莊制軍

光緒六年八月二十六日

復周福陔中丞

光緒六年八月二十八日

復張幼樵侍講

光緒六年九月初二日

復劉省三軍門

光緒六年九月十八日

復孫燮臣侍郎

光緒六年九月二十二日

復李丹崖星使

光緒六年十一月初二日

復黎召民廉訪

光緒六年十一月初二日

復丁稚璜宮保

光緒六年十一月初五日

復周福陔中丞

光緒六年十一月十一日

復張幼樵侍講

光緒六年十一月十九日

復黎召民廉訪

光緒六年十二月初六日

復周福咳中丞

光緒六年十二月十四日

復王壬秋山長

光緒六年十二月二十二日

李文忠公朋僚函稿卷十九

全集二之十九

桐城吳汝綸編錄

復李丹崖星使

光緒五年九月初四日

赫德欲以師丹礮船制鐵甲船總署頗爲所惑弟與幼帥極力辨
爭而赫德總海防司始作罷論弟已兩次函告總署請執事與徐
仲虎在西洋訪求合用鐵甲新式現存款百萬約可敷購一船雖
嫌單薄慰情聊勝無耳幼帥謂由華員訂購恐多周折省費必至
糜費不若仍屬赫德金登幹等覓購赫素不以中國購鐵甲爲然
今新罷總司海防之議更不便相託前已面屬仲虎至英德後留
心訪詢並查明南洋沿途運載接濟之法如何順手想已一一詳
告尊處預籌布置幸勿緩圖仲虎將來游歷各國工廠須月開銷
川資便中可向總署緘陳爲要芝田允令金楷里赴德仲虎初次

出洋一切須賴其導引屬其挈與偕行隨後由執事補行奏咨可也幼帥以船政生徒須續派往英法學習春帆半身不遂之症萬難痊愈已決意告退未卜替人鄙意前派學生期滿回國再議蟬聯緘請幼翁主持會奏儻訂購鐵甲亦須有學生在廠監造一面學駛庶船成時可雇洋弁一同駕駛來華均希蓋籌及之

復曾劄剛星使

光緒五年九月初五日

奉六月初四日手書鈔件應覆各事條列於左

一日本廢琉球爲縣各國譏評僉以中國於臺灣之役辦法太怯致有今日之事似也當日內外諸臣詰難日人亦謂琉球我之屬國難民被害我自酌懲與日何干而日人蠻不講理擅自興兵幼丹雖主進戰廷議依違其閒遂仍講和實啟戎心今其意固不專在琉球應付之法誠如尊旨用剛用柔須決一定計目前兵船未

備餉源尤絀剛尙難用祇有以柔制之而力圖自強爲後日張本
來示作書明告西洋各邦前偶與英國威使德國巴使議及皆若
漠不關心各國正合謀要求減內地洋貨釐金若因球事求助適
予以挾制之端至於請一大國公評則必須兩國合請日本旣爲
此暴橫之舉豈肯聽人斷其是非夏初美前總統格蘭忒來華恭
邸與鄙人曾屬其至東洋設法調停疊接來書但勸彼此不可因
此失和亦不肯明斷曲直現總署照格君函意照會日本外務省
由兩國另派大員會商妥辦尙未接其覆文何子峩與彼嫌隙已
成不復能與斯議恐終成延宕之局惟我添購船礮多練水師不
可再緩總署前徇赫德之請添購蚊子船八隻碰船二隻合之前
購各船分爲南北兩隊謂足制日本鐵甲船幼丹與鄙議皆不謂
然又經中止似爲禦敵計仍宜添購鐵甲船或可戰於海上昨屬

李丹崖徐仲虎在英法訪求新式執事就近查詢當更得其要領
幸留意詳示爲盼

一巴西公使尙無到華消息總署緘屬敝處先與商議除招工斷
不准行外若照西國成約恐難堅拒洋人歸領事管轄不歸地方
官管理於公法最爲不合但洋人刑罰從輕每怪中國拷訊斬絞
之屬太苛若令改歸地方官則須將數千年相傳之刑法大變乃
可定議日本現與西洋議改此條先將向用刑章改就西法猶慮
西人不能盡從試問中國刑部及內外各衙門能將

祖宗聖賢刑制盡改乎不改而強西人歸我管轄雖巴西祕魯小
邦亦不願也

一金登幹代購蚊子船經執事查驗稱爲防禦海口利器洵然赫
德謂可海戰攻破鐵甲似非確論前四船每點鐘僅行八九買此

次續購者能行十買既不及鐵甲之乘風破浪行駛至速又恐大洋浪戰被礮擊沈自蹈危險雖卽令守口亦須得力洋將熟悉兵船規制者幫同訓練前函懇尊處代向英國兵部海部借覓良將來華卽爲此事頃聞英水師提督古君面稱帶蚊船來華之船主拉副將人甚明幹擬俟到沽再商能留更妥

一使署房租歲五千金若有巨款多租三十餘年更爲合算惜經費不充無此遠圖殊爲可惜

一烏石山教堂經紳董延訟師在英按察處控訴已斷令回贖此後永斷葛藤前案已算完結聞中想咨照尊處

一威使在京議煙臺條約洋藥稅釐併徵仍照各口釐捐原數大致已定惟租界洋貨免釐須俟各國公使定論一時似難就緒
一白羅呢是否來華葛士奇前曾駐京乖張狡猾不來爲妙能設

法勸阻否

復李丹崖星使

光緒五年九月二十四日

船政提調吳惟允寄到劉步蟾等所呈西洋兵船礮臺操法略論一摺照鈔附呈乞執事與仲虎悉心考究其說是否盡符所陳蚊子船利於攻人而無能自衛祇可用以守港赫德必謂多購八隻自成一隊可在洋面轟敗鐵甲船總署頗信之鄙人與沈幼帥未敢附和仍擬訂購鐵甲但每隻價銀卽抵蚊船數隻必須酌擇妥善勿貽後悔摺內聞有鐵甲三項中國以何者爲宜務望詳審諮度剋期定辦一隻船首似應配衝鋒可兼作碰船之用此船到華或暫覓洋將管駕或卽令劉步蟾幫帶屆時酌辦春帆乞病開缺旨派召民加三品卿銜督辦船政諒當速起視事續議出洋學習一節召民到閩後當與幼帥公同酌辦

復沈幼丹制軍

光緒五年十月十七日

新購蚊船四隻早與總稅司約定來津交收執事未詢原委遽檄
閩局接替非鄙人所能反汗且六月閒卽咨請春帆派員來津接
管尊意或慮其無意予璧前言具在豈遂失信耶今擬令龍虎霆
電四船赴麾下調遣一該船在北洋兩年鹹水浸漬底有雜物黏
連必須赴滬修洗藉省往返一尊處奏明分防江陰吳淞二處風
浪少平龍虎形制尤宜倣處四船來年擬令常往大連灣巡泊取
其船舫加高可破巨浪非敢擇利以自衛也初欲儘存款訂購鐵
甲一隻總署旣不謂然又以南北分防取決於蒙之一言敦促再
三因屬赫德來津面商乃知其所謂碰船卽快船新式似極有用
已令訂購二隻覆總署函稿及赫德節略法兵官論蚊船在海面
與鐵甲交戰不利錄呈冰鑒劉步蟾林泰曾等計早到甯能否迅

速北上俟其到時或於劉林二人內留其一接管新船其一換帶
飛霆以便就近顧問來春由閩添配弁勇務乞諄致薇隱兄派局
船駛送庶接替較速出洋蟬聯一節蒙挈銜會奏以後仍望大力
主持武闈勞勩尙可支否念念

復沈幼丹制軍

光緒五年十月二十四日

劉林諸生至奉初九日手示敬聆一切弟面詢諸生於駕駛製造
祕要探討無遺劉林魏陳四生尤爲出色具徵造就人才品評精
當非捐班考官所能及從此製駛藉得門徑不至再入迷途何幸
如之彼宋已將會銜奏獎摺擬送覆請由閩主政頃又將四生請
保花翎一節咨商添入將來若奉部駁仍應頂奏劉步蟾留帶鎮
北可資考究林生奉執事密薦者委帶飛霆赴江不敢奪所好也
總署函告黎召民新斷絃少遲卽可出山將來莅事後船廠監工

能派魏陳二生商推辦法庶有裨助此則不能不賴大力提撕耳
尊症寒喘已成年例中外咸知卽有陳乞必難
俞允東事明年恐尙不能定議西事更無了期環顧時艱能無惴
悚頃令諸管駕回閩募勇封河在邇弟卽旋省

復曾劾剛星使

光緒五年十月二十四日

頃英國琅副將統帶新購礮船四隻到津兄登船勘驗並令琅副
將出洋操演陣式整齊靈變礮準亦好其人勤幹明練船學頗精
與商留此幫同華員督操伊尙情願惟以英例須向水師兵部乞
假允准該副將資格已深再歷數年可洊升至提督若准假後本
國停俸斷資未免耽誤升階懇由敝處轉致執事與水師部長官
商調中國借用三年仍與在本國當差勞績一般未知可行與否
務望大才酌度晤其長官妥爲計議兄並屬津關稅司德瑾琳函

致金登幹代向兵部商託如有成議卽由德稅司酌擬合同草稿轉交金稅司與琅副將訂約屆時尊處亦必與聞參酌一切也琅君新娶一月卽遠出又須回國請假擬定議後來春回華此兩卽屬其齋呈以備面詢顛末再赫德允代訂購新式快船兼碰船二隻據云每點鐘可行十五海里七年春夏來華已另文咨明冰案聞亦係阿摩士莊廠承造各國快船鮮有如此大礮及衝頭者閣下見聞所及幸爲查督其不逮焉將來船成時出洋駕駛學生有得力者可商派二副三副等職隨船來華卽無須另覓管帶鄙意欲延琅副將或英官好手教練目前爲礮船計兼爲他日快船計也

致曾劄剛星使

光緒五年十月二十七日

沅丈書謂執事有熊羆之慶忭賀曷任崇地翁見過云於途次相

晤知近狀順平地翁於到京日奉

旨嚴議開缺其與俄國所定條約交廷臣會議具奏都下眾謗沸騰恐有不測之禍此事始謀不慎地山又允許太易若竟廢約後患良多幼丹遽爾作古峴莊告養回籍未知能復出否江左重地得人綦難琅副將是否見過如何商辦廷議必欲延洋將教練兵船琅公於新購蚊船情形甚熟其人雖近剛激而辦事似尙盡心或可勉強就範儻水師部准假而仍停升或該將另有爲難此外尙有專門名家熟悉船務戰法性情和平堪任驅策者乞爲留心延致其辛俸月約三四百金以三年爲度如須在洋訂立合同並祈妥酌代爲主持見示敝處必一一遵辦也三舍弟函告令媛病狀少愈祇腹脹未消栗誠舊恙漸痊惟尙瘦弱知系附陳

復曾劄剛星使

光緒五年十二月初五日

地山過法既經會晤何以未將新議約章告知其分界所稍喫虧者將伊犁南邊兩山之閒一帶空地約數百里讓給俄人內有通南八城之路亦被包阻此左公期期不可京朝官羣吠力爭英法人詫異譏誚者也竊謂英俄嫌忌甚深聞俄得地又南八城貿易之途慮爲中阻是以譏誚交作法俄交情尙固乃亦隨聲猜疑殆不可解在地山則謂俄國臣民皆不願還我伊犁其君相念兩國睦誼專使往議不得已始允退還然必欲稍分其界以安插哈薩克及回人之來歸者不如是則必不還伊犁其實卽久假不歸於大局無甚關礙今成蛇足進退兩難左公意在主戰未免不知彼己不顧後艱

廷旨亦甚不謂然當交議之

命下俄署使卽於次日赴總署忿爭謂中國顯欲毀約和局不成

彼國非無力量亦不在新約之有無卽欲回國云云總署又將此事奏交廷臣一併集議將來似不過敷衍了事徒添痕跡弄巧反拙耳琅副將是否願來抑或另覓人僅予教練彼必不願似須略假進退哨勇之權但必其人明悉船學戰事軍規和平忠懇乃稱是選至薪俸略多尙是餘事乞留意選訂爲感閩省洋藥釐雖云八十兩偷漏極多若在新關併征偷漏較少卽六十兩亦甚合算

復丁稚璜宮保

光緒五年十二月二十五日

奉冬月二十五日手教敬審寵辱不驚指揮如意都中物議知眷倚甚隆嘿爾而息更可獨行其是從容籌布久之政成民和當更上邀

心簡也芥帆蒙請開復已交部議不致駁斥否昨接鄂生函告下

半年銷路尙暢比較上屆無甚虧缺至以爲慰渠欲議停運楚此
爲旺銷之證惟是楚民多不願食淮而淮商亦未必能包鄂課餉
源所係聞我公亦再四躊躇不欲遽發想見老成謀國通籌全局
之盛心幼帥現已作古峴莊難遽出山似須俟江左實任到後徐
爲察酌商辦耳攝政義等改由中甸赴滇或不致有艱阻伊犁新
約紕繆多端左帥與廷僚議駁並請嚴懲地山以閒執俄人之口
而駐京俄署使大肆咆哮已發電報請示本國昨復令樞廷會同
王大臣詳議但冀酌改數條又不遽開邊衅斯爲幸事否則兵餉
竭蹶至此欲再整頓萬里之防奚從措手耶頃始應

詔薦賢惟夾袋中素少儲蓄姑以叔芸堪備關道之選應
詔未知將來能邀

特擢否他日出洋需才亦未始不可借重藻鑑自有真也淮餉承

委解連批飢軍感戴恩信如何可言懋功廳一帶礦務尙可設法
試辦否今年言路條陳開礦者不少

中旨亦頗謂然但議以俟開平臺灣辦有成效各省再推廣行之
臺礦督理無人煤亦不佳唐景星純用洋法攻開平據云明歲冬
閒得煤必多而美鄙願他省若同時並舉爲利乃溥

復周福陔中丞

光緒五年十二月二十七日

京兆連出參案藕翁事須正月奏結恐將去官藻舟遲遲其行亦
佳蛟子船事粵閩浙尙無回信峴帥在粵聞已預籌有款未知去
後何如閩浙庫項頗絀未必先其所急頃赫德緘告西洋電報日
本擬照式釘造五十隻小國尙有如許財力堂堂大邦窘乏至此
備日不逮遑云備俄耶東省一隻似難向西廠定造卽煙臺登州
兩口布置兩隻亦不爲多每船月餉不足千金加以煤斤子藥當

不出二千兩另單附呈至帶船員弁閩廠學生探討較精但現多
赴英肄業尙未遽歸嫌其未經戰陣若有兩隻似須添統帶蔡鎮
國祥久帶師船曾統輪船雖未諳洋學尙樸實無習氣或可試用
敝處四船已奏明延募英水師宿將來此督操誠以華人粗疏不
及英將之嚴整赫德在總署屢以爲言政府所再三諄商者也來
春如定見購置二隻希卽詳示其價銀分三起兌付東力或尙可
爲俄約欲與議改數條口舌甚長能否不開邊衅殊無把握吳平
軒操守最爲可靠家境極窘無力赴部能否優給薪費俾免內顧
之憂直境臘雪優霑爲近年所未有

復張幼樵侍講

光緒六年正月初三日

手示愛注慇懃江湖魏闕之念噴溢楮墨何時歸里負土鄙人與
尊公爲患難之交承以表墓相屬奚敢以不文辭窳窳事畢尙祈

惠臨面商壹是爲幸西事誤在遣使之日一錯難追歃血未寒盟書又棄其何以示大信於天下初蒙

廷寄飭議所以不敢輕言翻案而又知事理之必不可從姑持兩端以聽中外之決計鄙意重在始終堅持實鑒於往事之雲翻雨覆終於變本加厲也茲發言盈廷旣擬續行遣使再遣未必有益萬里設防亦非易事尊論憂患方始知幾其神乎所示三策上策非外臣所能越俎中策則東北兩路太廣且非旗員不行難得文武智勇兼全之將下策乃分之宜竭力從事而已大患尤在餉竭無法可施

復譚文卿中丞

光緒六年正月初七日

兩浙吏治軍政得公逐漸整理必月異而歲不同曷任欽企筱園亟稱甯波宗守與候補鄒守仁溥循能卓著一經陶鑄當更爭自

濯磨購船一事係交赫總稅司代訂其價銀可分三期就近由浙海關稅司兌付似無須遠解來津尊意如可定辦卽請咨明敝處備案現東省擬購蚊船二隻粵閩尙無覆信應俟各處復到弟卽遵飭赫德躉購以免先後參差惟鄙人原奏請勿截留海防協款而總署覆疏未免誤會明知浙釐短收防餉未能照額解足尙望源源籌濟幸毋以本省購船相抵致煩筆墨爲惠多矣京朝官紛請備俄海內窮乏至此主戰尙易籌餉何著殊爲隱憂昨奉派曾劼剛移使俄邦冀不決裂劼剛亦難於措詞矣

復周福陔中丞

光緒六年正月十九日

東省擬購蚊船兩隻布置稍覺寬展執事定於何日出奏俟咨到再飭彙訂閩省已於臘月奏覆准購二隻浙撫來函亦屬代購一隻祇粵東尙未復到似裕澤生署篆後未暇及此弟二月初赴津

卽與稅司面商酌定計船到華須明年夏秋閒管駕及大二副等
最爲緊要閩廠素習駕駛機器學生較外閒泛募者稍精近已擇
尤分帶各船又半遣出洋習藝人才無多好在時日尙長黎召民
聞春閒抵船政容屬其隨時留意儲備至舵礮水手人等則由管
駕選募無庸另爲物色矣文質翁望前過保論及導衛濟運一事
據云已面奏與尊處商定俟勘明卽行入

告弟謂一則衛源淺涸恐一瀉無餘無甚把握一則俄約議廢王
大臣正會議籌防防餉且無指款焉有餘力經營河運渠以李和
帥勘定工程照減三分之一僅挑溝導引計河頭閘壩在內約共
八十萬金需費無多不致奪衛入運又海防若有警變河運亦在
籌防應辦之內如各省協撥一日不齊一日不能興工彼亦可卸
責等語想已有信知照閣下大才自有權衡或仍讓由渠處主稿

出奏萬一將來撥款有著恐須賢勞督率耳平軒工竣催令赴都
且初成全盛意長蘆積引部覆亦推緩五年

復李丹崖星使

光緒六年二月二十日

上海寄到電信碼號遞津譯出檢書查對至月杪乃緘商總署議
購八角兩鐵甲往復數四今始定議具奏悉如來指二月十五日
先發電函交上海道轉達計已閱知大概茲謹鈔摺呈核連奉手
示鈔件應復事宜條列如左

一英海部第二次開來清單價值似無可再減較初單已減不少
中國正當急需船式雖非極新深淺尙屬合用且土耳其定造不
久英廠復加修理當成利器不至如老樣舊壞爲各國所讖柏爾
來已奏定交閩省調用交價後即可赴華望與訂明該價應分幾
起匯付每起應匯若干先由電信知照弟接報後或由津滬挪解

或咨令閩省徑行籌兌隨即具詳函通知一切尊處發書至船政亦須詳及互相印證奧利恩奏定由南北洋大臣調遣須遲一年來華似修工尙未告竣應卽與英海部訂明合同如何分期兌價日監督與海部較熟徐參贊帶生徒游歷英廠務切屬其盡心妥辦此事以撙節核實爲要義此事未令赫德及金登幹經手難保不陰相忌沮乞留心防備

一柏爾來成交後來華尊議頭目等須雇洋員以便保險另由閩選派管駕管輪及生徒舵水等六十人來英隨船歷練抵華後可酌撤洋員其期滿之管駕生亦可幫帶回華已遵照具奏必有旨行令閩中照辦弟再加函切屬惟何筱帥於此事素不在行黎召民甫莅船政茫無頭緒吳蔽隱把持已久又未肯辦實事不知能否遵教閩中能管駕鐵甲者亦慮乏人儻竟回復亦必酌派管

輪舵水者赴英或卽令學習期滿之管駕生作爲副管帶仍遴派
洋員管駕來華爲妥至奧利恩旣需一年工竣訂約後亟派出洋
徒匠幫同工作及早練習庶交收駕駛不患無人沈幼帥嘗言鐵
甲船須令洋員定購若華人經辦必多牽制轆轤固係確論然赫
德等堅韌難制實未敢事事委之今執事倡辦此件大事責任非
輕尙乞聚精會神竭力籌謀務求妥密俾外國知我有人爲幸如
有必須親往料理卽速分身前去幸勿大意弟當與南洋閩省及
總署儘力籌款匯寄但定期兌銀恐有耽遲似宜約計時日略參
活筆早遲必照辦也

一水雷教習亦爲急務馬克衣佛廠之監工舍利門是否歲杪來
華旣熟精雷電著有成書日監督與廠主商明可充教習卽屬軍
械所查訪延訂儻舍利門不來或不願雇充更求於往英法時留

心延訂

一鐵甲如卽購成人尤爲緊要自以練船學堂爲根本閩廠練船學堂近稍懈弛乞隨時緘商召民蔽隱設法整頓敝處亦擬仿設練船學堂但始甚難師徒皆少擬俟現訂英水師官琅副將法水師官明亞到後次第創辦嚴宗光可勝斯任召民未必放手劉步蟾擬令管駕奧利恩能否勝任乞酌示

一續派生徒出洋須精選生徒酌裁經費二節甚爲切當容轉商召民酌辦尊處亦緘屬蔽隱慎擇馬眉叔到滬後乞病假尙未來見培養使才已咨總署恐眉叔學館章程未能照辦耳

一赫德前定快碰船在英之阿摩士莊廠參贊學生可隨時前往查閱考證一切已向赫德說明不必疑慮新式後門鎗望速代定萬枝勿推諉也

復何筱宋制軍

光緒六年二月二十三日

月復函稿十九

十二

查柏爾來鐵甲船照英海部二次單開實價核計上海現時鎊價約需庫銀一百零一萬餘兩將來交收後運送來華薪工煤油保險等費約計亦須十萬以外丹崖與日意格在洋經理必不至有浮濫就先後奉

旨飭撥閩省購船價銀抵購此船尙屬有盈無絀然鐵甲功用遠勝蚊碰各船閩廠出洋生徒皆能言之執事必已稔悉矣頃奉批回廷寄飭由尊處與春巖少仲諸公竭力籌撥不可稍有耽延諒必同力合作先其所急如數籌備俟丹崖續信定議卽應船價兩交閩口有西洋銀號匯兌更爲就近否則更須交上海道轉匯至奧利恩船若一併成交雖須一年後交卸亦必分期先付現僅南洋有定購碰船之六十五萬兩可抵其餘四十餘萬尙無著落

敝處存款無幾需用殷繁實無力代閩籌墊千祈鑒原爲幸丹崖
函屬由船政選派管駕輪機生徒舵水等六十人赴英隨船歷練
極有深意鐵甲船非難購難在駕駛之不得其人與法如派安人
隨同管帶頭目洋弁沿途練習到華後即可自帶酌遣洋員即使
不遽遣洋員必有日新月異之效乞執事與召民蔽隱安商勿以
無人可派謾誤盼甚盼甚續派出洋學生一節似可徐爲遴選核
定妥章外侮日偪時事日艱措拄需人幸無作抽身之計也

復劉省三軍門

光緒六年二月二十六日

自同治甲戌冬接奉環翰後忽忽七年未通音問頃子務至津披
讀來函緬懷英度就稔林泉樂志歌嘯忘年有韓蘄王湖山驢背
之風兼信陵公醇酒婦人之好烈士暮年豪放之餘毋亦拊髀肉
而太息耶屬以崇公新約朝士大譁廷議籌備邊防海防奉正月

抄

密諭所部淮軍宜有威望素著之夙將統帶劉某應否調赴天津
著奏明辦理等因適與子務熟商以瀕行面諭家事尙難遠離有
急便當強起目下俄人尙無動靜恐麾下不樂出山出亦不可以
久少遲覆陳擬稱在籍調養傷病聞未甚愈已專函往商俟可赴
津再行續奏尊意以爲何如海內將才無幾時事日益艱難鄙人
力小任重襄助乏人儻蒙惠顧前好翩然來儀實所欣盼薪如勉
力支持精力已不逮昔且有老親子美奉調直提欲鄂部四營北
征意氣亦稍頹唐矣張口一路
廷旨令調銘軍扼防昨商子徵該處山隘冬寒不宜多紮步隊轉
運尤甚費力擬先遣馬隊兩營守口而留全營屯靜海以待後援
子務已入

覲回時卽飭履任其才短於應變而廉正結實吏事加以歷練當可攸往咸宜足紓廩念

復丁稚璜宮保

光緒六年三月初一日

手示於伊犁悔約一事自告奮勇願往俄都折衝尊俎騰出閒隙布置東北沿海之防袞袞諸公若皆如我公心事光明何至杌隉如此傾倒佩服莫可名言使俄早派定曾劄剛恐難更易惟此舉殊欠斟酌地山以頭品京秩頭等公使之議旋卽翻變劄剛名位視地翁相去遠甚地山銜

朝命而出尙不可靠劄剛則由海外移俄知其未曾面

聖親授機宜又俄英猜嫌已深劄剛與英人交密俄必疑其與英句串更格格不入有此數節可謂畫蛇添足恐於國事無益有損耳萬國公法卽兩國失和無陵辱使臣之例但不接待不與議事

辱國已甚一誤再誤其可追耶左帥主戰倡率一班書生腐官大言高論不顧國家之安危卽其西路調度不過爾爾把握何在將來俄人不必遽動大兵止令所屬哈薩克布魯特安集延及白彥虎之眾入境肆擾數十萬人可一呼而至左公卽首尾不能自顧可爲懸心又況東北萬里無人無餉無兵如何措手沿海防務弟不敢不竭力籌辦昨與總署商定屬李丹崖在英定購鐵甲船二隻需價二百萬以外京外合湊已得百餘萬明年船到再陸續挪付以後選將練兵事理甚繁經費尤窘焦灼曷任俄事至此已無結局直累到四海困窮內變浸作而外侮益不支矣天下本無事庸人自擾之奈之何哉俄現未聞動靜似其蓄謀叵測不在旦夕之閒中朝向來積習過事若無事然有事則又倉皇失措也執事請纓不行計惟悉索敝賦以供四方之徵調然民力竭矣何時可

以休養念之愀然

復三四兩弟

光緒六年三月初三日

接二月十八日來書知家廟修改一節大兄五弟與弟等意見不甚相同屬兄將家廟支祠名目議定再函告伯兄酌辦當日兄與四弟商建家廟原因先光祿墓側既有隙地及早經營一以妥享先人神靈一便吾兄弟日後祭掃廬居其時兄尙未定有興築李樓之議意卽以此閒房爲歸田棲息所也四弟倉卒興工又未遑考究品官家廟定式正殿三間本太簡陋一成不易未嘗不私疚於心去冬三弟來信以房屋現多傾圮亟謀修理兄聞之深爲焦念緘請伯兄主裁藉此議修或照風水家言拆移西宅擴開中殿爲一勞永逸之計伯兄謂須詢謀僉同而後動工固是穩著乃諸兄弟議論分歧各執一是兄相隔太遠旣率忽於前遂不敢固執

於後屢函致伯兄俟弟等如何定議卽便興辦兄卽不過問茲閱伯兄二月十三信與弟等來函籌慮再三姑卽鄙意分晰陳之並鈔寄伯兄閱核

一弟等函云若作爲光祿公支祠正中一宅三間亦無不可若改五間照吾學錄禮制日後宗子遞入遞遷支子祇准隨祭而無入祀明文必啟子孫世世爭端兄按吾學錄云通禮家祭以官之大小分祭之隆殺不問其爲宗子與否是已闕去宗子主祭之說至宗子遞入遞遷不准支子入祀更無明文鄙意禮順人情緣情定制本可變通吾兄弟忝躋極品先光祿功德崇隆專爲立廟正殿不可不遵禮制改建五間免爲識者訾議中三間爲堂似可仿照祠堂辦法每間各一大龕中龕供高曾祖禰考妣四代神位左右間吾兄弟可依次入祀揆諸先光祿在天之靈祖孫父子歡聚一

堂當甚願也以後子孫不准再入亦不必祧遷廟以光祿公爲主
上推三世下及諸子似天理人情之至支祠名目不經亦無支祠
必應三閭之說家廟匾懸挂多年尤不應改大兄五弟欲拆去西
宅自爲形家所惑又嫌餘房太多省卻後累皆有遠慮弟等擬將
後添西巷拆去讓出丈餘地基已踰會典品官塋墓尺丈且廟成
十數年來家運日隆無甚壞事似仍舊爲是亦甚近理古者左廟
右寢故廟必立於居室之東今若拆西宅留東宅則廟在宅西又
與古制不合似應照四弟勿拆西宅爲妥但若改建正殿五閭或
將東西宅各拆去一二閭庶殿基加深寬大堅固經久此外餘房
不甚合式均不必計是在諸兄弟相度酌辦公產房屋太多後人
修守費力極爲正論惟自告成旋即拆毀亦非所宜子孫不肖住
屋不保卽家祠亦未必永守我等及身勉修各捐資存公善後盡

心而已國無千年不失家亦豈能百年不敗哉

一四弟自願包修大兄自願捐錢儘可照辦幸勿彼此推諉將要件擱下至修成後應如何妥議章程捐存公項聽兄弟互商定局應派我一分

一弟等函稱各房興造住宅糜費無數凡事將就即可惜福洵見道之言自今以後私宅營造必須停止祠宇大事卽士庶家亦所當先各宅華麗竊謂太過家廟過簡非禮貽譏未免輕重倒置望三思之弟等如以鄙意爲然希鈔寄五弟閱之津署長幼牘平

復曾劄剛星使

光緒六年三月初四日

自使俄信至尙未聞布置若何極深懸系總署擬請薦賢暫代英法使事似爲預留退步想參贊陳劉二君可勝此任否松生留英則瀛眷可不偕往苦寒之地進退尤爲裕如尊論廢約則暫不能

收回伊犁伊犁之病以暫不施治爲是洵屬中肯又稱與俄決裂
不至大有傷害俄人內懼民亂外防英侵未敢更與吾華大開邊
衅料敵亦甚明透至謂英人斷不許俄人得志於華是否確有見
地俄若得志於華首在新疆次則黑龍江吉林皆非英人力所能
及之處有妨於英則英或中梗無損於英則英商且從旁設法牟
利豈真能輸誠助力於吾華哉俄將軍高福滿節制西路各回部
最喜用武上年地山議約時俄君調回與謀伊欲與左公決戰不
願送還伊犁其君相因貪通商分界各便宜破眾論而許之今廢
此約正合高福滿之意蓋與我軍擊柝相聞又因細故生衅恐其
陰嗾所屬哈薩克布魯特安集延部眾及白彥虎叛黨時相侵擾
金和甫張朗齋所部各萬人飢疲已甚僅劉毅齋勉奮弩末首尾
未能兼顧設有蹉跌再失數城全局卽虞震動左公衰耄好爲大

言究其軍實餉糈素爲俄人所蔑視黑吉兩省旣乏將帥更乏勁
兵巨餉斷難與俄抵敵也朝野上下僉盼我公以三寸舌折衝樽
俎之間竊聞地山以頭等公使甫抵俄時俄廷方詢以說話辦事
能算得否磨折旬餘而後得見今執事居二等之班當舉朝鼎沸
之後若僅接見而不與議事其奈之何況俄英猜忌甚深知從英
都移來彼更多一防備其言亦無自入想成竹在胸必有應變不
窮之法企念良殷萬一俄肯與再議約能將伊犁南邊帖克斯川
讓我彼此界限畫清新疆各城通商照陸路舊章減輕稅則不許
全免漢中西安止准一路行走除此數大弊餘仍一一照行未知
能辦成否總之彼已到口之食復令吐出是大難事竊慮其蓄意
用兵必照原約而後已或更變本加厲耳巴西不日到通商和
好之約自應准立招工斷不能允前商延英水師兵官亦祇請其

教練非用作戰將西洋公例固熟聞之中國輪船兵法全未入門故不得不藉英人爲先路之導招致旣如此爲難尙祈徐爲留意尊麾業將遠役違恤其私令愛伴送乏人似應緩議

復周福陔中丞

光緒六年三月十七日

前奉正月二十一日

密諭以奉天營口煙臺海防責成敝處統籌兼顧呼應較靈等因昨因兵船尙未購齊據實覆陳請

旨暫緩責成蓋不敢驚兼顧之虛名也惟奉天已調宋祝三所部前往分紮各海口營口尙不甚空虚煙臺僅鎗隊一營實太單薄輪船艇船皆不可恃尊意騰出防河七營調省操練預爲海防緩急之備似宜及時認真選將整練稍有就緒卽撥三五營赴煙臺登州擇要扼紮以壯聲勢頃接滬報俄國新派水師提督調東海

兵船十二隻來華未知其意何向虛聲恫喝亦須防患未然也東
省礦產最多必應破除成見設法試辦喬野觀察來書謂執事擬
集資合作期於有成深為欣佩適馬中書建常到此留意淄川鉛
礦濰縣煤礦弟令其招股議有規模再齎函往謁稟商一切喬野
素知馬君當能道其詳也

復曾劄剛星使

光緒六年三月十七日

奉手示鈔函已接譯署電報知有使俄之行所陳難處兩端燭照
數計洞澈先幾曷任敬佩鄙函前已詳及聞總署會同王大臣議
覆將崇公原定條約逐節駁斥請

旨交尊處照辦俄若肯與議約駁改太多斷難就緒或不欲與議
或勉強與議而仍無成似未便遽告歸致敗和局識者多以蘇
子卿執節不屈望公而鄙人深知尊體畏寒不宜朔漠恐亦愛莫

能助如何如何政府畏清議實甚明知其難又不能不爲細駁仍
由執事密察事勢通籌利害或摘商數大端與俄廷辨難其小小
節目則奏咨諄請通融俾有結局是亦了事之一法耶此次使俄
爲第一難事我公生平磨難險阻亦以此爲第一難處之境置身
家於度外斯無入不自得乞無過慮莅俄後望將致總署函隨時
鈔閱俾釋懸懸赫德果已議及琅副將事沅丈請開缺
優詔慰留行當大任鄙狀牒平

復譚文卿中丞

光緒六年三月十八日

奉二月二十四日手書猥以畿甸偏災重勞盡畫先挪解晉賑捐
款五千並飭司集官紳籌勸悉索敝賦之餘尙蒙登高而呼源源
解濟仁聲義聞遠近觀感豈獨三輔吏民頂祝大德已也昨復蒙
天恩賞撥漕糧十萬石益以浙蘇粵淮各處捐助工賑次第並施

子黎欣欣然有生意但願從此歲豐人和得以專力籌備外侮亦
幸事矣台旆往勘各海口礮臺水師防務必更周密前擬訂之蚊
子船如因費絀罷議或俟粵局製有成效再行仿辦以期節省劫
剛四五月閒可由英赴俄來函亦欲不稍遷就但慮彼不與議或
姑議而無成終無退步其眷屬似須留英又仍兼英法使事固未
能勉效蘇武耳

復黎召民京卿

光緒六年三月二十日

船局經費日絀自非節無用以求有用不能起色停修停造舊式
之船壹意籌造新式快船少可勝多曷任翹盼魏瀚陳兆翱等在
洋學成總監工據稱仿造快船確有把握望留意獎拔裁成俾盡
其所長爲幸此閒逐漸購置新船管駕頭目暫取資於閩廠既慮
人才有限而水手等亦募南人尤恐人地不習故擬仿設水師練

船學堂爲造就之基勅辦伊始師徒均少丹崖星使迭函嚴宗光
堪充教習閩人多引重之夏間學生出洋後允飭赴津感盼之至
閩廠練船及後學堂章程乞先飭承鈔錄一分速寄以便參酌舉
辦爲幸丹崖以議購鐵甲船請由閩選派管駕管輪舵水等六十
人赴英隨船歷練幫駛回華兒雖照議具奏亦慮管駕難得其人
曾緘商丹崖如鐵甲有成議卽令在洋期滿學生內擇尤作爲副
管駕仍選募洋員管帶以專責成惟管輪舵水等須由閩酌派前
往沿途練習則該船到華後可期運掉自如昨接丹崖三月初電
報鐵甲價須躉付英允售尙在未定等語若一定議卽須兌價交
割派人往英查頭批駕駛學生於三月底期滿截止薪糧或由尊
處趕發電報屬丹崖酌留稍緩起程回華俟鐵甲購成便有現成
人可供驅遣也劉步蟾林泰曾皆曾在鐵甲船學習而劉尤勝將

來奧利恩船到後擬令劉步蟾管駕否則明春赫德所購碰快船
二隻到時卽派劉林二員分帶目前蚊船乏人接替似未便遽令
遠去耳黃埔船塢可修鐵甲鄙人亦聞之熟矣俟振軒制軍履新
當懇懇其妥爲經理粵匠工巧價廉甲於他省得人振興所造殆
未可量西學必應就地開設祈執事隨時緘勸當事及時提倡吉
林松花江與俄接界

旨令創設船廠鄙意欲疏薦溫道子紹酌帶粵匠往彼察辦未知
遷地能爲良否如溫道不克分身閩廠有可獨當一面之人帶匠
工機器前去否松花江雖不甚寬上通黑龍江下達東海實要地
也雨生足疾究竟何如上年會辦南洋未就廷議頗不謂然昨來
信不願督辦粵釐果卽出山無論何事必有裨於大局尊恙旣漸
痊復幸加調攝幹濟時艱正不獨船工一役借重長才也

復陳荔秋星使

光緒六年四月初二日

容元甫來謁言學徒拋荒中學係屬實情由於純甫意見偏執不欲生徒多習中學卽夏令學館放假後正可溫習純甫獨不謂然弟擬致函純甫屬勿固執已見尙祈執事便中勸勉令其不必多管應由子登太史設法整頓以一事權庶他日該童等學成回華尙有可以驅遣之處無負出洋學習初意也小呂宋虐華民弟前據招商局轉稟公呈咨商總署核辦嗣准咨緘請會商閩省將軍督撫辦理並令揆度機宜酌定一切弟思閩帥於境外洋務尙不關心且亦無法可設執事旣爲日國星使小呂宋亦日之轄境或將華民公呈商彼外部准設領事再咨照閩省及南北洋就近選派何如容再專文奉商

復周福陔中丞

光緒六年四月初三日

英銀鎊價隨時低昂本無一定大約規平每鎊合四兩內外關平則照市申算赫德原函及向來辦法每隻蚊船十五萬乃約數也事竣冊報方見準數此船造成回華約須一年半爲期運費保險併計恐尙須找補若干屆時再據文報轉達未便預定確數耳蚊船機器過精非由學堂出身之武弁不能管帶敝處前購八隻皆由閩廠調人分管猶慮疲懈不甚得力近仍添募英兵官教練而以中國曾經戰陣之將會統庶緩急稍有可恃蔡鎮久帶內江戰船甚有膽勇而於機器洋學實未入門將來似仍選學生管帶洋弁教習而令蔡鎮統率巡防就地擇才尙無踰於該鎮者但該鎮前在閩臺幼帥遽令統帶輪船月薪數百金志願頗奢此來示稍涉浮誇之語有自來也究其人尙樸勇僕所素知聞登鎮苦不可耐磨磋兩年俟蚊船到後有人管帶議月給二百金令其以本鎮

兼統照料海防或不致散而無紀且亦登鎮分內應有之責成卓見以爲何如

復曾劄剛星使

光緒六年四月初五日

新聞紙云俄都議崇公定約如不照行不能接見公使與西報電音約章已定絲毫不肯更改之說大致相同昨接總署函稱月前邵小村電報俄人知曾使俄詞色尙無甚難聞崇治罪其君因賞布策頭等寶星即與崇議約者而屬駐華各使代崇乞免謂定約又改崇復得罪恐新使蹈故轍須先立據云云總署頗喜其尙無決裂之兆未知小村所言果可信否尊處亦接其電函否若先立據要立何等字據卓見臨幾應變必有辦法正月閒駐京公使公函總署代崇乞免兄亦密緘總署謂崇不宜重罪致激俄怒其時聖意及廷臣皆欲正法賴政府援中外眾論與醇邸密請從輕乃

以斬監候定讞在中國自謂寬貸而外人猶有煩言尊處電函一再申請正合樞廷微旨不致召謗卽召謗亦不恤也總署與王大
臣議駁條約太多聞已奉

旨行知尊處妥辦四五月之交可以遞到總署函稱但據理懸擬亦祇可備辨論之資臨時仍恃善爲變通等語是明知其萬做不到姑爲此論以謝清議而免眾責耳地山在俄時雖事事均經電商惟分界一節總署電復斷不可行彼已面允俄人無可挽回遂貿然定議此其性急大錯處執事決不至此惟廷議堅執如此俄人強很如彼誠如尊論卽再遣使者數輩亦必無濟徒助波瀾添痕迹而已請無約小國評斷之說總署計必不行目下

禧聖肝疾未愈月餘不能臨朝

安聖敷衍其事不甚作主沈相因保薦崇公使俄致叢眾謗懊惱

成疾已請假一月樞府祇高陽秉筆洋務甚爲隔膜時局亦大可
虞昨筠老在籍具疏交敝處代遞內有六條大意言西約當由左
相與俄人議辦伊犁應暫不收回崇公不可重譴致違公法英法
使臣不宜使俄致觸俄忌廷臣主戰不宜聽從侃侃而談深中情
勢惜到京已遲已成之議無可挽救此老若復

召充總署能見其大必於國事有裨無如政府景李王諸公皆與
不合清流又紛紛譏謗是以薦賢數十人無論列及之者辦事人
少解事人亦少可慨也台旃何時起程瀛眷是否留英均深系念
都中人來謂栗誠場後氣體大愈慰甚

復李丹崖星使

光緒六年四月十七日

英海部八角臺二船果肯售否想定議後必有電報何筱帥已籌
湊六十萬兩解交滬道候撥柏爾來一船如先成交卽飭芝田匯

寄倫敦其有不足各處湊墊可先得一百十萬兩連回華運費計已敷用奧利恩一船儻須一年交付定合同之日應匯寄若干隨後分批籌兌則氣力較紓鄙人必勉爲之如果英部換人吝不出售鄙意擬照新式在英廠訂造二隻應以何廠何式爲宜約幾年造成價分幾次勻付乞與仲虎迅速妥籌酌定計現有款項外分年分月應付更易籌辦召民旣請留學生在洋無論購船造船不患無位置學習之處敬祈悉心酌度妥辦仍隨時電示爲幸閩帥奏派劉步蟾帶閩廠頭目水手數十人出洋幫駕鐵甲俟接尊處定議之信卽令劉步蟾交卸鎮北蚊船赴閩選派惟旣雇英弁用英旗則劉步蟾祇能幫駕卽頭目水手等亦不能多用華人究應酌帶若干人亦須核定電報做處及閩廠遵辦與洋弁立合同時可說明到華留用多少久暫屆時再議此事金登幹辦法已有舊

章望查照酌量妥訂快船不宜過重之礙言人人同赫德當與英廠商改也

復何筱宋制軍

光緒六年五月初三日

前奉三月二十日手書因購辦鐵甲一事未接李丹崖電復裁答久稽昨得來電以英海部換人不肯出售蓋聞中俄構衅恐啟俄人之疑耳尊處湊集各款大費籌畫業蒙匯解規平銀六十萬至滬令滬道妥存候撥丹崖前函本謂購現成之船以救急不若取新式之廠以仿造弟亦緘覆英鐵甲如不欲售即設法定造二隻擬再電催照辦而需款雖鉅陸續籌兌氣力轉較紓展出使存項除提撥南洋購船四十萬外恐不足再墊二十萬之數執事既奏准有案將來陸續借撥定造或可勉供頭批出洋學生留洋者照料造船兼資練習劉步蟾自可緩行矣英法各使欲爲調停俄事

必須先減崇罪未知廷議果俯允否

復吳清卿節使

光緒六年六月初五日

駢征就道順抵古城與鼎帥和衷其濟所謂二人同心其利斷金保障巖疆怵慰無似琿春稟報輪船駛入摩闊威如確係英國兵船尙無他意惟西洋電報俄派前戰勝土耳其之某將軍赴黑龍江吉林帶兵並先修墊該處行軍道路又添調兵船鐵甲船多隻往日本海參崴一帶駐泊有窺犯高麗煙臺之意與來示橫道河俄卡修路至琿春西南黑頂子之說已有印證英法各使僉稱俄人豫備興師屬實而尤以吉黑空虛代爲憂慮諄請赦免崇罪以釋嫌衅廷議雖暫密允諸使猶以未能大發渙號爲疑未知此後情形若何耳琿春防務最關重要新募之師一時未能齊集執事擬六月中旬前往就地察勘訓練果已成行否郭副將計可抵吉

隨同籌辦該處兵力本單又未經大敵尙希慎重機宜逐漸措注
爲幸孝侯精選將弁親兵人地不習未宜多帶晤時當告知恩促
似難齊備新營民勇西丹似可兼用但不必旗員分帶客隊統領
營官薪水外似應酌加公費夫價曾文正創立湘軍營制重加營
官薪銀極有深意欲杜剋扣必先贍其私也呿嗜士得鎗價少遲
劃還亦可以蘆餉劃扣候來文飭遵緝庭偕汪維城早經啟行振
軒函稱溫子紹未能卽往峴莊亦謂其非締創艱難之手昨已緘
商鼎翁矣竹報已交速遞琿春東南沿海一帶有無動靜隨時查
探飛示

復李丹崖星使

光緒六年六月初七日

五月初接電信英鐵甲因新海部不肯售應否擇善訂造等因昨
已專摺馳奏奉

用條圖一十九
旨著照所議查照新式在英廠訂造鐵甲二隻迅卽知照李鳳苞
速行定議早日造成不可耽延時日應以何廠何式爲宜尤當悉
心酌度認真經理以期適用無爲洋人所給虛糜鉅款等因欽此
聖訓煌煌允宜恪遵認真籌辦業經鈔摺恭錄

諭旨咨照在案本日先由滬發電云現奏明照新式在英廠訂造
合用鐵甲二隻望與徐親往妥立合同分起匯價早成爲要礮用
克鹿卜較好如續訂再信知四十七字想可早日接收趕籌訂辦
中國洋面宜用何等新式鐵甲似須較土國八角臺式尤精執事
與仲虎探討已久定有成竹在胸兩隻或皆在英廠或分選法廠
如何造法責成在公一人弟毫不遙制也仲虎應否酌帶學生駐
廠監工新造船價能否較柏奧兩船經費節省分起匯價隨時電
示滬市鎊價上半年較賤能於鎊價落時兌付尤省大約頭二批

價銀現成三批須豫爲挪湊尤望於定議後迅速詳細告知鄙見
英國前門大礮不及克鹿卜後膛之精堅及遠故宜專用彼礮南
北各局仿造彈子較易或謂洋廠造船愈多需費愈廉兩船本不
敷分布是以奏請併造四隻乃指撥兩淮商捐百萬部議准否尙
未可必招商局拔還各省官款亦須臘正方有三十餘萬竊恐造
費難遽應手未敢卽行電屬俟有定局當再馳布水雷艇約估二
十五萬四千佛郎已親往察看核實定立合同否毛瑟鎗急待需
用計可次第驗收起運焦盼莫名德弁漢納根面稱德國兵部存
有特來思舊後門鎗四十萬枝雖較毛瑟分量稍重曾爲德兵制
勝之用每桿連子一百約僅需銀二兩數錢在中土已屬難得前
令漢納根函請其父漢提督赴柏林查詢如果價僅二三兩擬訂
購二三萬枝其價卽由電報匯交尊處轉付並同漢提督妥細驗

挑起運爲要劫剛已否起程赴俄未得確報英法使爲崇公乞免
罪以釋俄人疑衅昨奉

旨暫免斬監候罪仍行監禁俟會抵俄辦理如何情形再降
諭旨外人更滋疑慮未卜將來結局

復丁稚璜宮保

光緒六年六月十五日

俄事經英法公使傳其國主之命出爲調停謂崇辦死罪由與俄
訂約是辱俄也俄故於伊犁黑吉兩路添重兵調鐵甲及兵船十
數隻來華卽有藉端開衅之勢請先赦崇以示不肯失和之據再
議改約經弟轉達總署請

旨交廷議准暫免斬監候之罪仍行監禁俟會到俄後辦理若何
情形再明降等因蓋恐兩國之給已也英法接電音後以明係藉
崇挾制俄人轉激其怒俄又怪西陲紛紛進兵疑中朝之必出於

戰邵小村署使復據情電詢似陰疑於陽之象俄固早有准備矣
劫剛六月初由英法赴俄計已抵境未知接待後肯與商議否微
聞俄人負強不改前約或另派新使來京脅逼亦意中事尊論此
時事機全局悉注敝處棉力斷不能兼顧東北全局然拱衛畿輔
責有專歸餉絀兵單不知所以爲計俄意偏注北洋及吉林黑龍
江仍效英法故智窺伺京城若各國調停不下必有大受窘迫之
一日聞公預籌每年三十萬備勤王之用大哉言乎非尋常俗吏
膜視國事者所能望其項背

批諭且作緩議待其時然後行弟仰體急公憂國之誠亦必待需
用喫緊時乃敢奏請惟有心感而已應撥准餉蒙飭提前趕辦以
應要需鹽務日見順手可勝欣佩春霽由京過談於奏對及謁恭
邸盛稱執事治蜀之廉公有威僉謂蜀人有此公論前事不辨自

明矣四世兄南宮高捷與舍姪經世同門兩家又添一文字因緣
可喜可賀世兄暫緩廷試大器晚成拭目俟之再俄若虛警無需
添兵現奏明在洋訂造鐵甲四隻爲日後自強張本所請撥淮南
捐款百萬卽部議准仍不敷四五十萬未知尊處籌備之三十萬
能抵用否擬俟丹崖在英議定合同分起匯價如屆時籌湊不足
當卽奏撥計期應在明年春夏之交中俄交涉大局可定弟必審
慎持重以圖之

復劉峴莊制軍

光緒六年七月十六日

劫侯二十九電報云俄外部以未商改約之先罪使籌兵從古所
無非先釋崇不能議事是以初七奉

諭卽行開釋迨電覆至俄又不知有無變態前廷議不欲假英法
以賞罰之權誠是也今俄有挾而求又徇所請而明發

諭旨且以布告天下何如事前早辦

恩出自上之爲得體聞寶竹坡先日攻訐政府張香濤陳伯潛諸君相繼劾詆劾侯語侵樞府十四遂奉

旨將執政交部議處鎗法之亂可知蓋爲難者不獨鯁生也劾剛雖有定識無如條約經廷臣駁改太多

旨令照辦恐一開談而俄知不能就緒必另遣使來華以兵要挾屆時似非張蘇口辯所可了事或有仍令地山往俄再議之說內意頗動此事但冀在俄議結爲妙惟非我國所能爲政耳俄兵船在東海者有增無減殊爲叵測防務自不可鬆沅霽兩帥添兵二萬畿輔藩衛爲之一壯幸而無事將來或有移鎮吉林者上海爲各國商貨萃集之區斷無擾動則道庫機局亦可不另設防江防力扼江陰焦山等隘當無意外之虞聞司局運庫積有存款倉卒

添募祇要後門鎗精練得法可爲游擊勁旅若鎗械不精有兵與無兵等想執事亦必慎重出之敝處旣添曾鮑兩路棉力差能自固津沽或無須吳唐北來

西聖病體漸復眠食均康祇望外症不緊當易痊可

復黎召民京卿

光緒六年七月二十一日

嚴宗光頃已至津蒙預支薪水三月並給治裝路費謝謝此間起造學堂日久尙未就緒賴春帆駐局督辦明春當可竣工嚴生已飭赴局差委其薪賞卽從十月接支也稔知尊處裁汰員紳而許孝廉苦求轉薦殊不近情荷留襄辦筆札自送脩金益爲歉仄總署久訾船政多弊由於船多舊式爲外人所輕日意格罪不容追而管駕自用大副以下各人役未免濫薦徇私則當事亦不能辭咎薪糧過優者酌量裁減將裁出之款另練水手極是正辦鴻章

近與西國兵官討論各國多募漁戶壯丁赴練船學習水手其管
駕大二副及機器弁目則在學堂練習弁與兵稍有區別是以西
洋水手不能升作官弁也尊論水手另設學堂是否別有所本若
以練船爲水手學堂似更妥便水手先要習慣風濤桅篷各事則
在船練習爲宜中國歲添新船多由閩廠選募船政似須有兩三
隻水手練船方可源源濟用必須考取分等記名始准各管駕挑
選錄用庶弊端漸絕敝處先後所購蚊船八隻水手皆係閩人洋
弁謂至今尙多濫竽者現亦擬另設水手練船就地儲材不得不
爾製造學生由洋歸者如暫難創造快船望遣令隨二批出洋函
致丹崖星使令其分往監造現訂鐵甲船俟船成隨船回華兩有
裨益尊意以爲何如春帆前已有暫停一半年積成巨款再造新
式之議旋因病退中止似止有如此辦法各國皆以多造快船爲

急務頃美水師總兵自長崎過津密談以俄國新調十五船內祇
鐵甲二隻其餘十三皆係快船較鐵甲尤得力我等欲振興水師
必當致力於快船其笨木船固略可敷用矣二批學生何時可起
程出洋彼帥恐不暇經營望台端設法籌催或謂日意格薪俸太
重出洋學生羅豐祿陳季同等皆可隨星使照料無須日酋乞酌
之劄剛至俄請追崇罪似有轉機而兵船猶有來者殊叵測也

復張幼樵侍講

光緒六年八月初六日

鄙人論事惟求實求是聽者不察或以爲過激究之明理克己二
語兢兢夙夜未敢或違辱來教祇增愧耳訂購鐵甲丹崖日久尙
無回信所籌各款旣未足數亦難應手北洋果有鐵艦四隻輔以
快船水雷艇十餘隻以大連灣旅順口等要隘爲駐扼之所相機
出入攔截敵船必多狼顧不敢徑入遼海此上策也然海口之礮

臺內地之陸軍仍不可偏廢若不能禦之於海尙可鏖戰於內尊
論前敵一摧全軍潰散敵甫登陸我已無兵可戰者自指庚申前
事而言稍知兵者斷無如此布置之理目下津防以零營分扼礮
臺留銘盛兩軍爲後路援剿游擊與尊指略同彼勇我智彼整我
散用兵本不主故常惟軍實以簡器爲先中外人人談兵皆不知
有兵而無器與無兵同自明以前尙有徒手搏戰者今則非其時
非其敵矣臨事號召數萬恐不敵數千可勝慨哉俄事未必卽戰
竊謂所以籌戰備者多采虛名毫無實濟亦幸而不戰戰則優絀
立見後悔其奚追耶便道過我一談爲盼

復李丹崖星使

光緒六年八月十七日

連奉手書空憊久未泐復茲謹條列如左

一鐵甲船式執事與仲虎考核旣精如四十號函內之妙用九項

最安喫水二十尺與十九尺無甚差池德國拜晏等船式樣甚新
自應參酌向英法各廠訂購劄剛搖惑之言斷不可信此與俄事
決無妨礙閣下係奏明責成妥辦更無可以旁誘之人仲虎謂有
不便四端極是幸堅持定見毅然任之聞價六十萬久匯存滬勿
令我輩食言爲要駕駛之人尊論劉步蟾蔣超英可冀勝任輔以
洋弁教習當可愈練愈精若不及時籌辦是自行阻誤咎不在人
也但日意格既隨赴俄恐尊處無熟手商摧或恐有受人蒙蔽之
處希加意研究期於必成弟前奏訂辦四船今因款項未能遽齊
先辦二隻必可應手中聞厚甲首尾無甲者既稱最爲合用應請
卽照新式酌購勿庸疑慮

一懷脫臺魚雷及法廠雷艇價均早匯去刷次考甫創造燐銅壳
閱試如較懷脫價廉物精應請酌定日監督既未能偕赴奧廠面

訂必須酌派鎗礮生及藝徒往習並令仲虎隨時督查詳探祕要
庶他日仿照造用不患有器無人

一所訂之毛瑟鎗九十月能否解到幾於望眼欲穿軍情緊急而
定購之項多不應時前漢納根請購特來思鎗亦爲救急起見旋
奉電示卽屬停止具紉關顧至廣東採購前膛短礮左帥專搜廢
鎗想皆需用急迫不暇精求做處雖不肯濫收廢物然精者總未
到手更何能奏停他處耶

一肄業續派出洋尙未據召民函商劫侯謂在英法者應歸使館
派員兼管以專責成固非無見前曾緘屬筱宋奏明由公使照料
惟執事情形較熟亦須會商主持委員文案少派一節可徑與召
民商辦

一俄事往不可諫劫侯續電以俄廷另派公使來華議約且其海

部尙書新任提督已由滬赴長崎勢將以兵船要挾
廷旨雖責令劾侯在俄議辦阻使勿來恐無妥結之法萬一定議
亦斷難如人意所欲出尊論甚有卓識存備采擇

復劉峴莊制軍

光緒六年八月二十六日

張廉卿素行耿介或因居客卿之位未先修謁然其樸學爲古文
詞已爲今之第一流執事宏獎後進自不可無以賙其乏也春霆
特召督師爲整軍經武遠圖已奉

旨准募萬三千八百人非我輩所能遙制政府自俄事起後謠詠
紛乘習爲模稜此必有從旁主其議者司農及近畿受累所不暇
顧矣劾侯在俄議約齟齬彼先派海部黑沙土幾來華統率師船
又令布策赴京會議顯欲以兵脅制情殊叵測海部於秋節前抵
煙臺日來尙無動靜聞埃布使到後偕同入都昨接劾剛十七日

電信似布策尙未起程未知有轉機否其兵船大隊麕集吉林海濱之摩闊崴聲稱攻奪琿春或謂先圖高麗海口各國慫恿趁此兵威占取朝鮮而高麗通商之說經弟函勸仍前固執奈何二十一日廷臣又會議俄事和戰二策迄無定論左相內召聞將剋期入

觀老成謀國或另有卻敵制勝奇計耶澳門立約未換一時似難議辦自津至滬電綫擬明春開工俟有成局金陵至鎮尊處似應添設分綫一條則南北通信更速矣

復周福陔中丞

光緒六年八月二十八日

俄事之壞自去臘寶張諸君慷慨陳言而起直至今日節節貽誤仍日進讜論其源自左相發之亦實由政府導之而自貽伊戚也劫剛疊次電報俄因張奏傳鈔乃派兵船來華迨免崇罪結積案

而其海部尙書已起程過滬矣。欲與議改條約，則云此不能在。俄定議，又遣使布策於八月八日起程。政府畏其來也，風波不測。因寶張之請，商調左相。人都謂可以主戰，嚇俄豈知俄人藐視太沖已久。其調往，揮春兵船二十五號，陸隊萬人，豫備煤糧藥彈百物俱備。大有乘機及時規取遼左之勢。若布策與左公相遇，則立形決裂耳。清議之禍，與明季如出一轍。果孰爲之耶？至於我輩受其訾警，更無足怪。上海定購林明敦鎗三千桿，克虜卜礮六尊，均係佳品。嚴飭各營認真操練，儘可制勝。硝強水一項，津局如有存者，咨取時自應借撥。將軍嶺礦砂一兩，果能得銀一分，大妙。馬建常願承辦否？昨其弟建忠將淄川礦砂寄至法國總局，名師分化。據云百分得淨鉛八十一分十萬石，得淨銀一百四十石。確有把握。弟見其畫押憑單如此，何東境之多地寶也。適淄川人鄒牧振岳

來謁屬鈔此單徧告淄鄉父老勿惑巨紳及縣令阻撓之論未知
執事肯力爲主持否滕令蒙准引退感甚東海關加釐無可湊撥
正稅更不易解足也

復張幼樵侍講

光緒六年九月初二日

劄剛續報俄允召布策暫回凱陽德謂接電報布已起程計下船
將抵紅海恐難更回蓋其兵船海部作勢甚大費餉甚多不欲空
手而反也冬閒北河封凍海面並不結冰俄人生長苦寒之地隨
處皆可踏冰登岸至琿春圖們江西北更易橫衝直突如入無人
之境矣自去秋議俄事後鄙人不敢輕言戰伐非爲津沽自全計
乃爲大局安危計聽者不察乃訾敝處獨不言戰豈知各省如與
強敵決勝負敝軍雖單或可多支時日與不知兵者談兵無怪是
非顛倒耳此事恐非盡許條約不得結局尤慮有條約外之事視

主議者德望風力何如海參歲摩闊歲嚴杵河一帶屯兵已近兩
萬仍有兵船續至者彼族僉稱注意攻奪高麗海口內窺奉吉試
問何以禦之彼時有不張皇以圖了事者耶沅帥住津旬日形神
枯憊兩足痿跛誓不出榆關一步鮑軍新募烏合既無利器又不
知用法擾民適足爲累未可獨當一面也津軍礮械藥彈經營數
年始供數月戰守與西洋用兵殆非易言持國計者平日不於此
等著力而空言浪戰豈非視國事如兒戲耶鎮北四船仍照洋圖
測海尙未另繪有人繪呈金州要口圖尙詳確附呈他日鐵甲碰
快船到擬抵旅順可以自固

復劉省三軍門

光緒六年九月十八日

凡與外國交涉旣揣強弱尤論詘直俄在西國爲最強其與中土
沿海沿邊交界三萬餘里更非英美德法可比伊犁乘回亂掠取

本不欲歸我舊疆在我則甌脫極遠之地亦可不急索還也中外
主國計者忽爾好大喜功再三追索樞廷不謀於眾竟以輒弱無
識之人充其選而假以權忽又舉朝狂吠廢棄已定之約理可謂
直乎自粵捻平後遣將裁勇而餉源愈竭歲供西軍六七百萬無
停止之期臺灣事起乃議海防名爲額撥四百萬每年實解不及
百萬北洋僅三四十萬耳無餉則無精兵無利器淮軍協餉亦十
去其四上年奉部議飭裁一萬餘人又分防南北兩洋勢可謂強
耶庸儒不知時務謂倣處簡器練兵歲費巨款必當主戰而執事
來書亦趨其言固由見愛之深亦不考究事實何也左相擁重兵
巨餉又當新疆人所不爭之地飾詞欲戰不顧國家全局稍通今
古者皆識其姦僞而來書亦欲鄙人效顰未免有違素志自與足
下共事行閒賤奏議論昭昭在人耳目未敢作僞今忝躋高位漸

屆頽齡更不作此無恥之舉矣且堅持和議則有之竟云不能戰三字則始終未出諸口亦未存此心也足下何從聞斯語毋亦竊窮京官爛名士口頭禪而故相戲弄耳去秋崇約初定總署先奏請飭下南北洋與左相議覆幼丹先復力駁條約不可行而無辦法兄覆請

朝廷自量數萬里兵力餉力能與俄久持則可始終堅拒否則廢而復允或更加甚焉是時左奏主戰已在途矣內廷接鄙奏不置一詞又交左復左公謂持論甚爲明通但此事非一二人所能定議請飭廷臣九卿以下會議此廷訟之所由起也左公戰是虛詞兄無意一問乃對不出遂請廷議以掠一時美名不料將弄成實禍也然自廷議以後兄於俄事未進一言未發一謀而說者遂疑其不能戰專主和朝野上下併爲一談亦未求其實在把柄殊可

怪也此等悠悠泛泛之毀譽何足爲人生重輕而執事乃重視若此豈高才遠識而亦出此耶來書舉漢魏晉宋時事以例今似尙未甚拓眼界但力求自強爲不易之方試問朝政何者爲自強之實耶其實不強而空作強話則危亡立見東三省至今尙無佈置僅數肉食將軍能了此事否大枝勁旅餉從何出卽新募烏合多亦何益至麾下若肯出山津郡萬餘人誠不足以盡所長懲憑諸將羣起攻之是何言歟吾生平未懲憑攻人人自相攻耳如別開生面獨當一路唐軍非兄所能主銘軍一聽取搆丈夫戰敗則死耳何惜此區區爲其他餉項軍火均不敢承吾始終未忍棄公而來書見棄已久又何言歟數千里外何能事事請教形跡之疏其咎似不盡在鄙人旣蒙責望不敢不盡其愚進止機宜惟公自決

復孫燮臣侍郎

光緒六年九月二十二日

接劄剛七月二十二日函稱崇約之不公允西國皆知俄人亦自知之向使地山之歸吾華不動聲色但言所訂未妥不能允行是西人常有之事何至遂有失和之說祇因舉措慌亂而備戰之說自我發之故至如此棘手病之增劇實由於藥而當時主方之醫猶不緘口何耶云云極爲洞中肯綮凡處大事須以平靜出之議戰議和紛紛喧鬧轉使外人得窺

朝廷之無主見究竟所謂邊防果皆處處可恃否卽所駁條約亦皆處處允當否鄙意竊料劄剛在俄一月內恐無成議事之變態尙不可知弟自去冬以來久不與謀俄事前因英法使代崇乞罪轉達總署致叢眾謗繼以總署函商俄約偶抒己見屬令電告曾侯又蒙詰問其實鄙言何足爲重輕亦斷不肯強參機事也左相西事交替需時聞須明春到京屆期俄事當有定局中朝贊襄未

必有益而玉門內外善後僅委之劉楊二公徒自擾攘此亦舉措
慌亂之一端也

復李丹崖星使

光緒六年十一月初二日

所擬鐵甲船式似甚精密約費較省於奧利恩各廠開呈細價計
已比較核定旋閱西北各廠有無更改擇訂兩艘或在一廠或兩
廠或在英在德想早酌定有續示在途矣前接電信票匯二十萬
鎊業由滬道陸續匯寄以後如何分批匯價何人駐廠監工悉聽
尊裁再作區畫擊雷艇之小礮聞各國改用虜登飛一寸鋼子新
式俄船赴華者皆有之似較格林尤爲擊遠有力何以尊處尙未
偵知務望酌辦至將來驗收運送各節若用英旗所慮三難尙未
盡確奧利恩兩船擡價未成係伊不肯售非我不願買或不至猜
忌刁難外部應由英使備文俟十八箇月船成俄事必已定議訪

侯必已回英此係吾華要政劫意當無疑沮英人亦無保局外之
權雖非金登幹代辦英亦不能禁華人之不自訂辦既有星使主
持祇要船式精而價廉赫德亦不能從旁阻撓續訂碰快船將成
弟已派丁提督葛雷孫及林泰曾等帶員弁水手二百餘人赴英
驗收升龍旗回華此次如辦理妥洽嗣後當可預籌照辦尊意擬
由商廠造竣包運上海礮械另載他船是否可靠沿途停泊添購
煤水及一切意外之需如果先期籌商定妥卽不保險似無他虞
望再妥酌德國士旦丁廠造法與英無異未始不可試辦奏案不
妨變通也已運棉藥火藥兵鎗鎗子皮帶盒驗藥器及德國伏雷
各件現屆封河僅到頭起獵鎗二千餘枝及電燈途中遲滯可恨
棉藥五十噸尙非急需儘可陸續購運惟大批毛瑟不能速到令
人望眼欲穿留聰穎藝徒往德廠習魚雷造用之法最爲緊要將

來雷艇到時務令藝徒隨來效用否則有器無人能知用法與無器同船政續批生徒召民尚在挑選習練未知何時成行第四年展期經費及已墊川資當已匯到劾候函懇留日意格監督薪費似未遽允使法參贊繙譯蓋監督薪費較優也應否暫行撤局非敝處所能越俎可由執事緘商召民劾候酌辦論中國洋面兩鐵甲尙不敷用前奏請分起訂造四船部撥准捐僅四十萬招商局官款亦分五年提撥難遽集有巨貲祇可儘力先訂二船如有餘力或再添辦快碰水雷各船或續訂鐵甲容隨時妥酌商辦

復黎召民廉訪

光緒六年十一月初二日

接丹崖八月閒來函以鐵甲船式已酌定限十八箇月告成俟各廠開有細帳詳細比較擇訂兩艘或在一廠或兩廠應否酌派員役駐廠監工再行呈明學生展期已滿所習已全似可遣回暫留

聰穎藝徒一名派往德國習魚雷造用之法等語蓋因敝處在德廠訂購魚雷雷艇須人學習以便隨雷來華試用渠既未擬定派幾人赴廠監造又稱學生無須留洋再習其意僅留一人學魚雷似魏陳二生亦可稍緩派往矣粵海關應解南洋經費是否確有可指快船何時可以興工甚為盼念二批學生約計何時方能出洋務先函告丹崖為幸敝處現派丁提督葛教習林泰曾鄧世昌等帶大二副水手二百餘名赴英接帶新購碰快船來華各蚊船管帶大二副等曹部一空轉瞬春融需才甚急望執事豫選數人以備咨調或待劉步蟾稟調亦可威遠濟安各船已飭回閩山東新購蚊船二隻明春可到乞貴廠代籌管駕等接帶

復丁稚璜宮保

光緒六年十一月初五日

俄事經曾劼侯在彼議辦復召布使折回初限一月至九月杪已

滿續又展限兩月聞其電報云俄允歸還伊犁南境松花江行船
西漢通商均可商改惟索償兵費一千二百萬盧布合之地山原
許五百萬盧布約須銀千萬兩內意欲稍減讓未知何如彼意謂
商改條約事所常有而罪使調兵舉朝議戰是以東西水陸各路
彼亦不得不調兵將以圖抵敵戰雖未成而自我發難應議補償
雖係逞強無理之談亦可見去冬迄今攘臂而爭國是者貽害不
小矣各處調防之費既虛糜千萬議款若再增千萬民力如何可
支元氣焉得不盡悔可追耶來示謂須加益然後可以成事明見
萬里欽佩曷任弟因俄議未定曾鮑二軍分駐畿東海防未敢解
嚴現雖封河仍須駐津坐鎮俄兵船屬集琿春海參崴一帶奉吉
防務喫重究無可恃之將省三奉
召至京暫乞假回津就醫俟事竣卽回里耳渠奏請創辦清江至

京鐵路以便兵商轉運與敝處奏准添設電綫相輔而行洵爲自
強要政惟帑項匱竭之餘欲借洋債興辦非常之舉難必有成若
得我公量移南洋或能合力籌任也鐵甲船已訂造二隻尙可勉
力湊付若再添購非仗尊處於鹽務協濟數十萬斷難集事然非
至無可設法時不敢遽呼將伯幸垂鑒焉淮餉三批仰蒙提前飭
撥感甚撫屏留都侍醫爲羣醫所撓據云

西聖誤服他藥國家大事無一不誤於道謀良可慨也

復周福陔中丞

光緒六年十一月十一日

慶軍之餉慨允分任欽佩奚如峴帥接

寄諭後尙無函牘來商敝處前准咨鈔覆疏卽經咨行江南暫照

舊籌解淮餉以供支放嗣奉會商妥議之

旨又經照咨去後所擬東蘇分任之說僅爲執事陳之冀可調停

結局若峴帥始終不商詢鄙人似亦未便插訟如渠有專函徑商
尊處或可就此定議最爲公允弟如續接函牘亦將尊意告知或
再會銜覆奏也昨接揚州糧臺報稱筱軒瀕行時已將該六營本
年九關餉支清並豫借來春米價是此事少遲定案固自無妨高
村決口頃據大名鎮道馳稟趕緊購料調集兵夫將串溝十數道
堵合接築小隄已於初一日合龍現俟隄東水涸有土可取剋期
補築大隄加倍堅厚約估共需十數萬金除先後提用大名庫款
四五萬練餉局二萬金外不敷尙鉅勢須求助於仁鄰徐鎮往濟
甯嘉祥鉅野一帶查勘漫水無多久旱後且有資以種麥者今合
龍迅速元氣無傷轄境振撫之費所省實多且從前東明隄工均
由丁稚翁撥款創辦此次補還原隄事同一律擬卽奏請尊處協
撥八萬兩如蒙

俞旨務乞迅籌就近解交大名劉道收用俾得無誤事機感禱無
既赫德函報代訂蚊船二隻明春可到其原來管輪礮洋人須每
船留用二名教習各技俟該船華人學熟再遣回國等情敝處前
購各蚊船皆係如此辦理緣船礮機器繁重必須熟手教演其薪
貲無多可受節制也至管駕大二副管輪機人等應仍於閩廠選
調昨已緘商黎召民酌辦容再咨催沽口蚊船弁兵及艇船水手
已挑派二百餘人赴英接管新購礮快船回華實無可再調統帶
訓練之員亦甚要緊蔡鎮能否勝任望早留心

復張幼樵侍講

光緒六年十一月十九日

省三回津日趨覆奏鐵路事此乃鄙意所欲言而久未敢言幸於
吾黨發其端聞都人士近日講求洋務者多亦不甚以為紕繆殆
國運中興之幾耶惟事體重大非獨棉力不能勝即省三慨然自

任亦恐窮年畢世不易卒業時政苦文法拘束甚矣

廟堂內外議論人心皆難畫一無真能主持之權卽斷無通力合作之日以是徘徊審顧未卽屬草少遲姑就事理略一敷陳耳尊論南北鐵路成招商局利必大減似無足慮商局生意在各口原不專恃津局且由南而北鐵道須過津門江海客貨仍多由輪船達津以就鐵軌也西洋新報謂中俄議約未成又有變局正增杞慮來示聞改爲伊犁償款加四百萬盧布事出有名尙不過費似可如期安結卽布策春融復來度廬小小節目必與譯署成交劫俟久不報知做處總署自倭議參差後音信亦少日以坐鎮練兵爲事不復與聞機要耳根卻甚清靜省三雅不欲度遼朝命若來恐將藉詞延宕凡主人不知兵之處客軍決難相容省公英姿伉爽更不耐爲北洋水師提督終當議設宿將竟無諳習

此道之人省三亦尙隔膜卽資其威望其如性不耐官何如雪老
之巡視舳板師船毫不倦勤固自可敬究於大局何裨哉某公怠
於理事長於趨時彼見譯署與穴戶定議正可藉以結驩固寵豈
復慮及後艱將來接收琉球南島責令經畫定可拱手授之他人
也筱軒貿然帶所部赴東大爲劉周所窘敝處雖力持暫濟月餉
而江左無一語諮商殊令居閒者爲難湘陰提師人直興復不淺
然謂船政輪船足敵俄之鐵甲快船又稱俄雖強不若粵捻回之
難勦奚翅夢囂

復黎召民廉訪

光緒六年十二月初六日

出洋學生鄭清濂等四人丹崖函稱留德監造鐵甲及敝處訂購
雷艇魚雷等件分派學習現在德廠定造鐵甲一隻式樣甚新然
船礮雜項約合一百四十萬兩較前擬購英廠土耳其舊式鐵甲

所增已多加以將來回國運費恐須百五十萬前奏撥鐵甲兩船
經費本尙不敷今湊辦一船所餘無幾尙未知能續購一船否此
開蚊船管駕大副管輪管礮人等挑派出洋後空缺甚多山東添
購蚊船二隻明春必到所需管駕大二副管輪礮等亦專候尊處
分撥應用前飭劉步蟾查開可用人員指名咨調內多出洋學成
經丹崖保送之員聞在閩尙無緊要職任台端衡鑑高懸定蒙擇
尤薦送感盼曷任劉步蟾船學頗精氣質稍浮迭經面加裁抑冀
有成就承示其不認抱養父母天性殊薄容再留意誠勉之鄧世
昌質地樸厚而帶船運氣不佳頃令出洋歷練一番當有進益閩
廠學生大都文秀有餘威武不足誠如來示似庶常館中人不似
武備院中人然帶船學問究較他處爲優在因材器使隨事陶成
而已二批出洋稍緩慎選爲宜粵海關應撥海防經費不至無著

委員提催當有躉數俊星東來春交卸亦須清理本任未了之事
俟撥到卽興辦快船甚以爲慰吉林船廠仍要開辦前屬玉軒轉
商由閩廠酌派淺水小輪船尙非難事諒蒙加意選擇矣

復周福陔中丞

光緒六年十二月十四日

工款蒙又飭解二萬正與鄙願相符感佩曷旣吳丞廷斌熟悉機
宜辦事覈實據稱添築埽壩月隄年內未能竣工尙須開正補完
而附近黃莊李連莊一帶奇險迭出必須及時添做埽壩以禦汛
漲仍擬將該三處險工相距七八里外各築遙隄方爲一勞永逸
惟需費過鉅無從籌辦直境黃隄喫緊若此與東省利害其之不
得不重賴仁鄰之仗助也召民復函允於開河後遴派管駕大二
副北來當可無誤尊意蚊船二隻無所依輔平時置於無用有事
適以資敵洵思患豫防之論欲令與倣處碰快蚊船併泊旅順以

成大枝水軍並可兼顧登州洋面一舉兩得欽服莫名蚊船非礮臺不能立足旅順之臺需費十數萬金異日必爲北洋一大屏蔽該處有此一軍扼紮登州煙臺敵當不敢久泊現延英兵官教練紀律甚精似不必爲二船另派統帶吳春帆謂蔡鎮船學尙多隔膜且有嗜好恐尙非其選容再隨時酌奪奉商也昨接總署密函劄剛冬月二十七來電俄約業有成議伊犁允還帖克斯川一帶加償費四百萬盧布連崇許約合五百萬金西漢通商松花江行船刪去已卽畫押奉

旨准行矣少遲當有

寄諭通飭知照筱軒所擬換輪船移大礮借水雷三策均可緩議船上礮位過大不合陸軍行隊之用漁人安設水雷豈能深悉奧妙望將鄙意轉致爲荷頃得峴帥冬月二十日函稱慶軍六營薪

糧尊處既難應承暫由江南照舊撥解不敢爲出門閉門之事等語並無商請閣下分協之說或者前議又作罷論耶

復王壬秋山長

光緒六年十二月二十二日

闊別十數年想望風采前有蜀士過謁謂執事主講西川與穉公相得重以婚媾正殷馳念適奉冬月二十六日手書遠辱明教初佩曷已筠僊出洋以後於時務更增歷練實能知其所以然惜其所遇不偶而口訥不足以達意文字賈禍致遭擯棄世運爲之也尊論洋務不及鄙人似專就十八條可許言之究非定評鄙意亦非條條皆可許諾但追咎前事之誤雖聚六州鐵不能鑄此錯今劫剛在俄爭得伊犁南路帖克斯川刪去西漢通商廢松花江行船專條償款添盧布四兆連崇約合銀五百萬內意深爲嘉許促令定約畫押劫剛亦知無甚關要徇眾議而爲之耳所爭者於中

國並無實濟而彼已稍厭愆壑士大夫之愚惑

朝廷之無人亦可笑已近畿增防二軍明係備而不用亦幸而不用然欲除禁撤防非疆吏所得言南洋各島悉置領事近日談洋務者多爲此論弟前愆憑筠僊於新嘉坡設領事以爲之倡功效茫然蓋西國政令畫一凡創闢之士無論何國公使領事絲毫不得分其權而我閩粵人之久居彼境者亦習慣其約束而不敢相抗至鐵甲輪船游歷各島旣不用戰而可習兵洵爲馭遠要策弟久蓄此志奈鐵甲甫經訂購一艘餘無指款輪船則各省有主之者中朝旣不過問旁人更難越俎天下事無一不誤於互相牽掣遂致一事辦不成良用喟歎處今時勢外須和戎內須變法若守舊不變日以削弱和一國又增一敵矣自秦政變法而敗亡後世人君遂以守法爲心傳自商鞅王安石變法而誅絕後世人臣遂

以守法取容悅今各國一變再變而蒸蒸日上獨中土以守法爲
兢兢卽敗亡滅絕而不悔天耶人耶惡得而知其故耶因公江湖
廊廟之憂不遠數千里諄諄開示用敢一發狂言以相質證海內
人物蕭然鴻章垂垂已老而公亦非少年蜀游樂甚歲晚興懷

李文忠公朋僚函稿

卷之二十目錄

致左相

光緒七年正月十二日

復丁稚璜宮保

光緒七年正月十九日

致曾沅浦宮保

光緒七年二月初二日

復黎召民廉訪

光緒七年二月初二日

復張廉卿中翰

光緒七年二月二十一日

致吳伯華觀察

光緒七年二月二十一日

復黎召民京卿

光緒七年四月二十五日

復左相

光緒七年五月初三日

復黎召民京卿

光緒七年五月初四日

復左相

光緒七年五月二十一日

復左相

光緒七年六月初二日

致丁稚璜宮保

光緒七年六月初四日

復李丹崖星使

光緒七年六月初五日

復黎召民京卿

光緒七年六月二十日

復丁稚璜宮保

光緒七年六月二十三日

致曾劼剛星使

光緒七年六月二十四日

復李若農讀學

光緒七年七月十二日

復丁稚璜宮保

光緒七年七月二十二日

復左相

光緒七年閏七月二十五日

致游子岱觀察

光緒七年閏七月二十九日

復左相

光緒七年八月初七日

復曾劼剛星使

光緒七年八月初八日

復李丹崖星使
光緒七年八月十七日

復丁稚璜宮保
光緒七年十一月十七日

復劉峴莊制軍
光緒七年十一月二十日

致李丹崖星使
光緒七年十一月二十二日

復涂朗軒中丞
光緒七年十二月十九日

復丁稚璜宮保
光緒七年十二月二十二日

復李丹崖星使
光緒八年正月十八日

復張振軒制軍
光緒八年正月二十日

復黎召民京卿
光緒八年正月二十三日

復李丹崖星使
光緒八年五月二十八日

復張振軒制軍
光緒八年六月三十日

復孫藁田讀學
光緒八年七月初二日

復張振軒制軍

光緒八年七月初四日

致左相

光緒八年七月初五日

復吳筱軒軍門

光緒八年七月二十六日

復吳清卿節使

光緒八年八月三十日

復李丹崖星使

光緒八年九月初九日

復黎召民京卿

光緒八年九月二十八日

復周筱棠京兆

光緒八年十二月十六日

復張蕢齋署副憲

光緒八年十二月十八日

致左相

光緒八年十二月二十日

復倪豹岑中丞

光緒八年十二月二十四日

復張蕢齋署副憲

光緒九年正月初七日

復吳清卿節使

光緒九年正月十四日

復左相

光緒九年三月十六日

復左相

光緒九年三月十九日

復左相

光緒九年四月初五日

復左相

光緒九年五月初四日

復張香濤中丞

光緒九年五月初五日

復左相

光緒九年五月十六日

復張蕢齋署副憲

光緒九年五月二十日

復周筱棠京兆

光緒九年六月十三日

復吳筱軒軍門

光緒九年九月初三日

復張香濤中丞

光緒九年九月十二日

復丁稚璜宮保

光緒九年九月二十四日

復彭雪琴尙書

光緒九年十月十五日

復劉濬卿

光緒九年十月二十日

復翁叔平宮保

光緒九年十二月十二日

致李蘭孫中堂

光緒九年十二月十五日

復張香濤中丞

光緒九年十二月二十八日

復左相

光緒十年四月三十日

復岑彥卿宮保

光緒十年五月初五日

致曾沅浦宮保

光緒十年五月初九日

復許星叔少司寇

光緒十年閏五月二十四日

致曾沅浦宮保

光緒十年六月初一日

復張樵野京卿

光緒十年六月初六日

復周筱棠京兆

光緒十年六月初九日

復吳清卿副憲

光緒十年十二月初六日

致徐孫麒星使

光緒十一年三月初五日

復許竹筠星使

光緒十一年五月初四日

致陳芟南觀察

光緒十一年五月二十八日

致日本參議伊藤春畝

光緒十一年八月初九日

復崧鎮青漕帥

光緒十一年九月二十九日

復曾沅浦宮保

光緒十一年十月初五日

復崧鎮青漕帥

光緒十一年十月二十五日

復張朗齋中丞

光緒十一年十一月十二日

復曾劼剛襲侯

光緒十一年十二月初九日

復丁稚璜宮保

光緒十一年十二月十三日

復曾劼剛襲侯

光緒十二年正月十六日

復曾劼剛襲侯

光緒十二年五月十二日

復曾劄剛襲侯

光緒十二年五月二十日

復醇邸

光緒十二年五月二十二日

復吳薇隱觀察

光緒十二年七月二十日

復徐孫麒星使

光緒十二年九月二十二日

李文忠公朋僚函稿卷二十

全集二之二十

桐城吳汝綸編錄

致左相

光緒七年正月十二日

別十餘載每念廓清西域艱難百戰勞苦功高而鴻章謬膺拱衛亦復竭蹶經營應接不暇道途修阻音問闕疏缺然於懷軻饑彌切頃准大咨欣諭駘征夙駕漸近畿疆分應負弩恭迎班荆道左藉申契闊商榷機宜惟去冬因俄事未定客軍烽火相望海防難遽解嚴不及回省度歲咫尺有天涯之隔悵慕莫名昨已飭司派員前往沿途照料代達拳拳劄侯臘初來電已與俄外部定議爭回重要數端總署當卽復令照議畫押尊處應與聞其詳矣日本球案議結稍嫌遷就曾以鄙意上陳東使悻悻回國未卜有無變態沈相忽於除日作古一切乏人贊襄想須蒞台旆抵都籌布大

略也

復丁稚璜宮保

光緒七年正月十九日

俄事於臘初接劾侯電信允還伊犁帖克斯川一帶西界照明約
喀界不照崇約塔界在崇約明約之中勘定西漢通商刪去不提
松花江專條逕廢領事設嘉峪關吐魯番兩處交收伊犁另定三
條償款添盧布四兆連崇約合銀五百萬兩奉

旨卽照定約畫押計年底必可竣事俄人本無戰意尙肯委曲求
全劾侯辦事不遺餘力殊於大局有裨不日當有

旨令沿海客軍酌量減撤矣左相帶隊東行大有滅此朝食之意
自因不欲首倡和議然此事非速和則斷無歸宿數年未通音問
昨接其咨鈔陝省報起程一摺內云過直與鄙人詢商一切適因
防海未能在省迎候先作手書略敘契闊此後儻入直樞垣總署

彼此商議事件甚多固不容稍有隔膜遠承關念敬以奉聞省三到京知俄議卽定無可位置遂疏陳興辦鐵路請假來津旋乞續假回籍奉

旨再准一月無庸回籍茲假滿復申前請未知內意何如津防淮軍不及二萬各有統將枳棘非鸞鳳所栖似不樂鬱鬱久居有警則聞命卽來可資禦敵也中國海防非創辦鐵甲快船數隻不能成軍前購蚊船十一隻分防南北洋祇可作守口水礮臺之用所訂碰快船二隻稍大今夏可到擬令同蚊船併駐登州對岸之旅順口以扼北洋咽喉稍作聲勢所訂鋼面鐵甲船一隻需銀一百四十萬明秋工竣來華此船係爲臺灣定辦仍擬續購三號分布南北部撥其僅三百餘萬內如招商局官本須分三年提用又難咄嗟立致是以未能放手爲之將來續訂鐵甲如需湊款尊處前

擬鹽款能否應手望密示知屆時酌量奏請感盼曷任船政學生
出洋習駕駛三年頗有精通英船訓練紀律者加以歷練或較老
將麓材差勝弟才力衰弱無能爲役辱承明公殷勤敦勸不敢不
勉尤望中外同心協力助成此舉稍張

國威亦免有事各處紛調陸軍糜費無用也東明高村潰隄幸卽
堵合連善後各項需二十餘萬東省協濟八萬餘俱由直羅掘黃
水滾至隄根壩埽難恃終非久局欲於十里外加築遙隄實苦無
此巨款耳

西聖久病淹纏必強諸醫合方入春加重撫屏欲退不能壬秋想
仍主講席前書縱談洋務隨意作答中有燕人舉燭之誤幸轉告
之

致曾沅浦宮保

光緒七年二月初二日

頃奉月朔

寄諭果有總制西陲之

命專圻廿載始晉兼圻在公固迺遐勞苦榮觀淡然而

天降大任非公莫屬則早卜之於數載已前不待恪靖入朝乃贊

成斯議也恪靖謂隴上漸臻富庶邊事可任毅齋蕭規曹守從容

坐鎮不勞而理況值伊犁定約俄人必無反覆照章通商藉得經

營善後安定百年久大之規非公大才奚以措施裕如哉

聖眷物望遠近交孚雖蓋躬未甚復元而精神尙能理劇幸勿堅

辭益勵晚節是所企禱台旆何時入

覲南雲幹臣善臣諸君皆可獨當一面之宿將不才與爲聯絡臥

護儘足放心如何撤留應暫緩議仍候鈞示酌商前總署寄到劄

候續電照鈔呈覽目下畫押電報計亦抵都矣

復黎召民廉訪

光緒七年二月初二日

丹崖冬杪來函鐵甲每艘須派監工二人徒匠十餘人第聞回華各生致函鄭清濂有創辦鐵甲正我輩富貴之日苟非高官厚祿切不可就等語深慮回華各生聚行挾制方商德海部儻華監工不敷儘可商派德水師監工代勞費亦不多請卽會同尊處酌定今旣蒙派定魏瀚陳兆朝陸麟清三生並帶匠首七人充藝徒同往不惟監造得力將來學成仿造不患無匠魏陳二生尤鴻章與丹崖所盼望揀派者具徵籌謀久遠造就人材之至意該員匠等想於正月閒搭船起程矣聞廠生徒一得自矜貪慕榮利雖未敢聚行挾制而習氣實不能免由於從前過於姑息執事莅工以來隨事整飭愧厲之趨向當稍改變承派學生來津備充蚊船管駕大二副管輪管礮之選蚊船輪機精巧尤必管輪得力前咨漏未

提及臘月六日函內復申言之儻未選派務求迅速補選管輪三
四人備用爲感吉林開廠創舉得人非易惟允觀察在船政始終
其事胸有成竹自可勝任愉快俄事既定銘將軍迄未催辦吳清
卿與之不合亦有退志且該處工料毫無憑藉經費亦無著落容
俟惟允到津妥商一切謀定後動自應勿先具奏泰西製造之精
一由公私學堂認真督課一由官民合辦爭奇競勝中土祇船政
有學堂而生徒亦少所以久而無效尊意先開鎗廠專造後膛鎗
格林礮近日甯局亦能仿造格林礮及施立盟送來之那登飛礮
二者大同小異但那登飛礮專爲擊水雷快艇而設西國兵船多
用之格林礮則陸軍守營攻隊較宜惟林明登後膛鎗與格林礮
子式相同可以通用近與丹崖等詳確考驗各國皆有新式後膛
鎗林明登已爲中下之品滬局能造而各營多不願領若欲試造

必須擇一新式如英之亨利馬梯呢法之格拉德之毛瑟美之哈
乞開思皆可仿照第聞每種造鎗機器非二三十萬金莫辦加以
建廠鳩匠爲費不貲無已或先仿造那登飛於兵船制雷艇最爲
適用甯局既能仿造尊處更易爲力前與施立盟訂購十尊尙未
運到俟到時自可酌借一架作樣也外洋貿易一事梁陳二君果
願合辦集股二十萬元已否就緒如有成局敝處當酌助公款二
萬金但望諄屬經手者妥慎試辦聞西國商會把持傾擠必不能
免根腳立穩則擴充招徠自易耳快船繪圖造模逐漸興工觀成
有日曷任欣盼魏陳二生遠去計程功必不能速也劫侯畫押後
已請假兩月回巴黎丹崖函告日意格已先回劫侯留用與否並
無續信以理度之俄議已成似監督薪水可裁祈酌辦並電屬丹
崖轉商劫侯爲幸左相到京奉

旨入直樞廷總署惜其於近日洋務尙多隔膜卽如奏稱船政造成各船可敵俄人東來鐵艦可爲笑柄

復張廉卿中翰

光緒七年二月二十一日

敝鄉人議修廬州府志家弟季荃爲之倡曾有敦請執事纂輯之說蓋因嘉慶初年舊志乃姬傳先生主筆今求私淑惜抱後先輝映者非公其誰與歸季弟忽於去臘奄逝昨吳筱軒函稱與閣下已有成言佩慰無似鴻章離鄉久且遠未知郡志現係何人接辦擬卽寓書查詢如局事未散志稿稍有頭緒仍令包封遞甯隨時求教筆削潤色俾底於成曷任感盼

致吳伯華觀察

光緒七年二月二十一日

吾郡志書關係鄉邦文獻必應及時修輯舍季弟慨然倡議並勸闔郡現任文武暨各營贖資已有成數近年家報中屢經商及兄

方慮其不克終局正初得季弟奄逝之信其經手未了公事惟此
件尙無頭緒實無以對鄉人楞姪少不更事學淺望輕斷不足善
其後已函諭其力辭志局提調適省三在津與商接辦之人謂非
執事不可正與鄙見相符曾屬香畹先爲轉致頃舍四弟來信亦
以非請閣下主持經理善舉必至中輟屈指舊時同學同患難今
尙在家者惟執事歸然獨存此等要舉眾望所歸實屬責無旁貸
義無可辭務求引爲己任會同太守安定章程嚴杜浮冒以期早
日成書是所切盼林遠村本非著作之手老憊顛連已允辭纂修
一席季弟前有請張廉卿裕釗主筆之說吳筱軒函告已與議訂
廉卿爲海內古文大手筆係兄至交昨又專緘布託鈔呈台覽但
有分門采訪事實彙寄廉卿筆削不至媿陋貽譏省三昨已旋里
兄亦面屬其隨時隨事與閣下商辦諒無推諉渠往來金陵正可

晤商廉卿諮度一切也各處志局大率由公正紳士總辦太守事
繁本難纖悉過問且恐有瞻徇情面濫竽薪水之處志書尙無眉
目聞捐項已支用萬金不知作何開銷已函屬劉俊卿將現存八
千餘兩俟接辦有人方准發交祈閣下參酌從前辦法另立新章
如有怨謗鄙人當代任之將來成書時費用不繼容再商酌此函
乞便寄黃太守與局中公閱爲幸

復黎召民京卿

光緒七年四月二十五日

各生密考精當之至方伯謙暫署蚊船管駕洋弁頗稱其能林永
升葉祖珪擬俟山東新購蚊船到津派充管駕黃建勳林穎啟派
帶水雷兵隊隨洋弁教習冀可有成至揚則哲等七生學力尙淺
尊論均不足培成大器祇可留備新船派用承續派管輪七員學
生二名何時可到管礮既無熟手姑從緩議山東蚊船須六七月

乃來屆時或由舊船勻撥留洋兵照料可耳春帆宿恙增劇力辭
差使此閒勦辦水師學堂練船需人接替適惟允過晤已奏派是
差吉林三姓甯古塔防務清卿甫經奉

旨督辦尙未議及船廠且亦無此巨款也惟允所帶製造繪圖兩
學生擬交大沽船陽差遣威遠船聞已北來途中擱淺在滬修理
未到濟安暫調赴浙不日想亦赴津英廠碰快船月內啟行將來
擬在旅順口扼紮老營非多得數船併成一小枝不足張海上聲
勢若連直東蚊快及各兵船計之約共十餘號可漸成軍乞公留
意檄催該二船速行並將口糧名冊咨送接發為幸外洋貿易招
股已齊何時開辦俟官鐵礦與瑞國略同極為難得羅臻祿等試
辦當有把握擬令何人督工如已定議敝處二萬金即可匯付船
廠及南北機器局需用生熟鐵甚多洵為當務之急惟購器安鑪

聞須水銀二三十萬一時能集事否唐景星初議開平煤鐵並采
今連開河築路已用去七十萬僅可日出煤數百噸疑其用人立
法未盡核實故此事尤以得人爲要義也尊處快船開工而經費
未能濟用殊爲系念粵海關欠解北洋額稅極多素習疲玩南洋
可片籌撥否學生出洋比當定議矣鴻章於三月二十日入都叩
謁

東聖梓宮適有會商事件四月望始回

復左相

光緒七年五月初三日

擬加洋藥釐稅節略較前示更爲詳明各口釐捐如何加法儘可
由我自主不必謀之外人但華洋商人交手後捐愈重則偷漏愈
多所以必須中外會議允協或由香港派員躉收分撥或由各口
新關總收滲漏較少威使覲定此旨故作刁難實爲狡滑非眞糊

塗也鴻章回津後適有英外部專人赴威使處探詢中國歲銷洋藥確數欲就商添包稅釐之法來謁時業將尊意索加數目告知彼謂回英與印度部商及昨瓊州鎮彭玉過謁據稱由香港來亦聞英官與華商議設公司包加各省稅釐未卜果有成局否此事非英人畫諾實力幫助恐終無實濟耳貴部親軍與閩青方伯一營均報行次涿州永濟橋內外淤沙挑移不易勞苦可念大旆尙擬前往察勘能否緩竣秋涼直屬水患除永定河在夾牆中行非月關河道別無治法此外則自滹沱改道後汎濫於河閒任邱文安大城各屬爲害較烈頃在獻縣開數十里減河使於中途引歸子牙正河又大清下游壅淤令在文霸境內挑濬丈餘今秋當易歸壑皆僅擇要爲之據省局司道勘詳上游應濬之工以雄縣清河高緒龍河爲最容卽鈔咨冰案惟該兩河淤曲太甚工段太

長似非兵夫二千人所能剋期圖功若募民夫協挑需費尤巨無
可籌措目下伏汛將屆亦非其時乞大才通籌全局就近商請恭
醇兩邸指示爲幸保安大屯村騾夫斃命經王守查辦正法具仰
紀律嚴明欽佩奚似沅翁回湘尙無來信聞其過鄂足疾漸瘳頃
栗誠樞眷附輪南旋心緒當益惡劣

復黎召民京卿

光緒七年五月初四日

呂庭芷品端守潔上年指分來直適值停分展限之際姑予局差
以維繫之春季假回並未聲明辭退念其日暮途窮每爲軫惜旋
聞有就闕幕之說適接尊示邀任船政提調似足鎮式浮囂雖船
務機器素非熟習而精細廉靜涉歷稍久當可爲執事臂指之助
庭芷前爲左相奏調新疆差委將來到省必干部駁船政爲海防
根本用人可不拘成格如能附片奏明他日出路更寬藉以脫卸

新疆亦妙矣頃接丹崖來函並鈔劄剛函稿照錄呈覽續批學生如須出洋人數較少或將日意格薪水酌減仍令幫同星使照料以資熟手望卽酌定逕覆爲荷管輪七人已到飭留營學習矣

復左相

光緒七年五月二十一日

繕刻洋藥請加稅釐大疏剴切詳明欽佩奚似尊意以重罰爲嚴禁名正言順極合政體各省自應齊心振作竭力籌辦惟各口一聞此信姦商立將到口洋藥儘數收購囤儲以待出示加價時運銷射利數倍將來卽照議倍加販者少來購者停滯皆意中事各處恃藥釐爲緊餉不免多一計較又釐捐愈重偷漏愈多較前收數必不能甚旺耳見飭關局詳切議覆再行核辦誠如尊諭各處事體難以強同當有因時制宜之法也

復左相

光緒七年六月初二日

枉過暢聆教言送別河干依戀靡旣昨奉手示並讀大咨當卽照錄咨呈兩邸鈔圖分致各處咨覆冰案矣文內附陳管見行永定河道諮訪妥議以期實事求是當蒙鑒亮日內計已抵涿永濟橋上下淤沙挑除想漸就緒暑雨不時水潦將至弁勇勞苦日久汜可小休滹沱減河勢順據工員吏道及獻縣分報雨後增漲竟能奪溜全歸子牙正河堪慰蓋塵兩邸處或須埃大駕莅都始挈銜入告也

致丁稚璜宮保

光緒七年六月初四日

閱邸鈔敬審

眷倚日隆光復舊物公忠弼亮上契

主知下孚眾望忭慰莫名弟於三月中旬奏准叩謁

東太后梓宮奉

禧聖面諭與樞垣會商邊海防務卽以鋼面鐵甲船僅訂一隻李
丹崖續函約共需銀一百六十餘萬亟須續訂一隻而撥款萬不
敷用因請提淮鹽捐項六十萬及尊處去春奏明備撥之三十萬
諸公均以爲然旋津後卽專疏馳陳鈔咨冰鑿頃奉部議照准計
亦移行執事遵辦矣鐵艦爲防海利器尊意亦敦趣添購幸得丹
崖星使在西洋考究有年此次所訂實係新式無美不備視日本
所購舊鐵甲固相去倍蓰卽英法俄來華之鐵船亦尙不如其精
堅利用故價目少昂將來我公量移東南擊楫中流非此等不足
以備先驅而資策應鄙人遇病求艾未雨徹桑惟足下可引爲同
志乃敢以巨款再三瑣瀆仰累蓋籌亦知鹽釐湊集匪易協撥尙
多第非常之需必待非常之人以助成之如蒙鑒允祈委員分批

解交湖北轉運局荆道德標察收轉解應用爲感淮軍額餉與此
片款無涉並懇飭司局照常籌撥藉濟口食勿相牽混無厭之求
高明定蒙原亮也左相精力甚健於樞廷政務各省情形不甚了
澈所建練旗兵借洋債興畿輔水利加洋藥稅釐諸議似屬救時
要政卻近老生常談恐有格於時勢不能盡行之處昨由涿州來
津察勘河道暢談三日稍知直境水利難興爲林文忠以前諸公
議論所惑然其心地光明耐勞好強固君子人也昨覆陳河道一
疏奉呈教正价藩計已回蜀驚弓之後歷練更深劉六如士奇從
軍最久幹練曉暢可當一面頃赴建昌鎮任乞加意驅遣之

復李丹崖星使

光緒七年六月初五日

自春徂夏疊奉手書緣二號鐵甲未有成議倥偬久未泐覆昨始
奉部議覆准撥款除鈔咨外茲將應復各事條列於後

一四月二十六日寄電云二月初十前來信收到請照現定鋼面鐵甲原式再訂一船等語目下鋼鐵市價已漸平否若照原式再訂價目能少減否仍與伏耳鏗續定合同否款既有著應趁閣下在洋定辦以期駕輕就熟非鴻章所敢臆度遙制總求執事妥細酌辦廠中料物須防偷減工程須防草率調到監工藝徒等監造兩船如不敷用須商海部代辦不致偏護欺蒙否

一送到鐵艦合同照鈔咨送總署南洋船政各處並將補就圖幅寄去

一船價付期第一號應照來單飭江海關道按期匯寄第二號俟尊處續訂電信到後再行飭匯若遇鎊價低時買票匯寄尤爲合算望核定用款備一咨文知照敝處籌付爲要

一既商訂保固到津後三箇月由廠雇正副管輪並借用德員作

船主似不能照英廠碰快船之例派員前往管駕屆時或卽派監工藝徒等隨同分充各執事水手人等應否由津閩各船選派出洋抑應在西洋雇充均望豫籌示遵船成下水應照碰快船例升挂中國龍旗

一兩號鐵船工竣計須至八年年底閣下必應始終其事使德瓜期雖不甚遠而

新命兼使義奧荷蘭尙須三年交替幸勿急求回華弟在京時已與總署言之

一現兼奧義各使想已分往呈遞

國書歲會之期再往暫住數日似無須留員分駐各國交涉事件甚少除荷蘭外並無專使駐華義國總領事僅常駐滬耳總署如何示諭儻添調參贊馬眉叔在津有經手要事礙難遣行慶常徐

仲虎議論殊屬無稽眉叔童時雖在教堂讀書今並不與教士往來至方兒粗習英文英語涉獵未深因年輕尙須鄉試且有家務未便遠游羅豐祿昨亦調津充水師營務矣

一花翎已奉

旨允又准部駁頃又附片頂奏必荷

特恩闈廠續批出洋生徒尙無定期召民於此事似不甚踴躍玉

軒已

簡美日祕公使

復黎召民京卿

光緒七年六月二十日

庭芷月初由津南下日內計已抵閩得人襄事忭慶奚如庭芷名

心尙淡然年近六旬亦當豫籌出路此時暫行奏調使脫去新疆

策曰埃數年後船務熟悉爲用方大也威遠昨已到津將來碰快

船可併紮一處丁提督稟稱新船入華擬順道赴粵省及尊處查閱一切該船喫水較深恐不得至南臺或在羅星塔一帶暫泊請示望飭催早日赴沽現尙未據報由英啟程似須秋間各省兵輪零星分布臨事斷難得力無如內外於此事均屬茫然平日置之不問有警紛紛調援皆紙上空談而已鄙意北洋各船到齊聚紮旅順口爲老營派人統率訓練稍壯聲勢惟該口雖甚扼要得勢凡築礮臺添陸軍建軍械庫煤廠船塢至少須費百萬以外一時未易就緒來年鐵甲船成當再請調濟安超武以附益之鎮海於津河爲宜陸倫華情形極熟祇好暫留供差出洋貿易一節比准大咨卽會南洋與尊銜入告並給諭商總咨復冰案轉交此係中國創舉該商等銳志經營不可稍掣其肘姑以五年爲限不准他人另行開設屆時察看如

生意暢旺毫無流弊自可再請展限想尊意亦以爲然也絲茶銷
市漸滯湖絲幫附搭正可窮究利病聞中土烘繭纜絲不甚如法
該公司於抵倫敦時逐細考較尤與湖幫有益未知何時可以開
辦俟官鐵礦小辦亦須酌用機器鍋鑪冒澄聞已回籍肯力任此
事否丹崖函稱日意格已允減薪水續批生徒出洋有期否吳筱
軒軍門來津謂周鳳震人尙樸實前水手等挾嫌稟控查係子虛
疊次救援外洋失事船隻頗稱得力似宜緩撤

復丁稚璜宮保

光緒七年六月二十三日

鹽局三十萬仰承金諾奉文後立即照行分批委解公忠碩畫真
能以天下爲己任者環顧並世殆無儔匹前在都見樞農各堂均
以俄約賠款五百萬無措爲詞弟力言若不速籌訂購鐵甲整頓
水師則以後遇事生波賠款尙不止此再四商議始允以川淮鹽

款見昇然非深知我公於軍國大計瞭然掌上而日往來於胸中亦未敢冒昧陳乞也丹崖星使電報續訂第二號鐵艦正在議辦大約分批匯兌可以年半解足爲期鹽局若有爲難不妨陸續抽撥若公常在蜀知必源源應手惟曾沅翁久病未愈自粟誠病歿其次郎又委頓在牀心緒惡劣聞七月閒顛請開缺必可邀准西陲非楚人莫辦則東南一席舍執事其誰與歸屆時如有調動務懇將此項奏定分期撥解勿稍延欠俾後來者不致失信感企曷任日本議球事未協彼仍據守如故內意亦未催問不致遽開兵端但球事一日未結中日之交不固卽防備不可或疏北三口照常布置霆軍已撤一半餘俟秋後再遣藉節餉需蒙屬慎重以圖書紳敬佩近得撫屏書

禧聖諸患俱平僅背熱偶有輕重擬二十五日卽報

大安臨朝治事中外臣民之福自津至滬創設陸路電綫冬內計可完工峴莊並擬由金陵接做鎮江從此南北通信瞬息往還極爲靈便黎召民勸集粵商公司赴倫敦貿易已有成局此近事稍可告慰者左相奏請洋藥加釐恐偷漏愈多鄙意欲在香港總匯處抽收未卜果有成否

致曾劄剛星使

光緒七年六月二十四日

移節俄都互換事竣卽回巴黎動靜多嘉至爲頌企沅丈病未甚愈聞因思臣病篤心緒更惡七月當籲請開缺交收伊犁及喀塔各處定界事宜金錫劉各帥計必照約妥辦不至別生枝節也左相與威使議加洋藥稅釐不協乃奏請各省關自行辦理每箱連新關額稅通加至一百五十兩

廷旨嚴飭各疆吏事在必行左公以加稅釐示罰禁欲洋藥漸來

漸少意固甚善惟各口未加釐之先香港每年偷漏已二萬餘箱之多將來各口驟加則香港及各處偷漏繞越弊必更甚誠恐得不償失而鴉片來華仍不能減適有粵商議於香港創設公司包運包銷包完各省稅釐政府亦有以爲然者兄昨於議覆左相加稅釐疏內附片及之聊備一說鈔呈台覽此事關係重大必須印度與香港英官允行方可試辦威使陰庇印度餉源英商生意一味狡獪無可商議敝處擬派馬道建忠改裝前往香港印度各埠密察商情就便齎函徑晤各該處總督討論一切大意以中英兩面大局在我須免偷漏稅餉在彼須保印度入款如何妥籌漸減漸少之法若有成議再看華商能否集費設立公司英員能否照允欲先洞悉底細乃有辦法此係鄙人私見並未商明譯署第恐馬道至香港印度後彼或電報外部儻向執事詢及乞將微意轉

告爲幸

復李若農讀學

光緒七年七月十二日

手示於粵東洋藥利病洞悉本末瞭如指掌左相未深知各省洋藥走私掣肘情形貿然奏請加徵過重弟在京時曾告以釐捐愈重偷漏愈多更恐變本加厲此各省歷年欲請增加而不敢遽行者政府諸公亦極言其難左相毅然獨斷乃有此通飭之旨近聞峴莊制軍亦覆稱上海未能照行如必欲行須由總署與英使定議毫無牽掣而後可振帥想亦同此遲疑也尊論有顏曾冉季之德行政事兼用申韓之法術洵爲破的試思德行政事固難其人申韓法術亦豈能復行於今日者循行故事之冗員營私戩法之武弁愍不畏死之姦民蓋徧天下皆是矣政府能言之而不能親身以禦走漏督撫能杜走漏又焉得許多賢能廉介之員

弁供其驅使始終如一且恐因以激變紛擾藉寇齎盜予人口實且通商條約原准洋商在口售賣洋藥釐捐加重必羣然句結洋商自賣分毫無徵此偷漏之大者更無法可防也英官沙苗前來津謁晤欲與華官合辦洋藥稅旋聞李玉衡等糾合粵商湊貲設立公司包辦未知果可靠否又未知港督與印度英酋肯任承攬否以中國抽數與英人共之本難深信但議加稅釐必須在洋藥發源處設法使無可偷漏明公其有意乎幸隨時確訪密示爲荷

復丁稚璜宮保

光緒七年七月二十二日

鹽局三十萬擬分三批委解約冬閒便可解齊前請委解武昌轉運局茲更補咨備案伏乞鑒照現銀頗費周折自應交妥實匯號分兌滬鄂常有輪舶來往轉解甚便鄂生觀察月初過津暢談閱歷更深氣度益覺闊遠深爲左右得人慶惟奏定留蜀升轉誠鹽

政萬不可少之人而升途未免稍隘彼且慮旌節他移在上無主
持亦難乎爲下矣弟屬其抵京後將此意婉陳當路必有善處之
方何子弢常有信來謂日本竟將球事攔起彼已據爲己有祇要
我不往索視若固然尙無必欲致死於我之意但防備不可少鬆
耳津關道鄭玉軒已放美日祕三國公使叔耘才堪專對但內意
尙未共信容當設法位置以培其資望純齋尙未回華而謠詠甚
多使東恐將中變可見流俗毀譽之無定評也

復左相

光緒七年閏七月二十五日

閩青方伯等入山履勘日內計有定議儻能如卓見擇地伐石築
壩鑿渠俾上游節節湔疏洩得宜不致盛漲時復被衝塌如往
歲玲瓏壩故事洵於永定全局有裨至下游工段土方前飭該河
道於秋汛後確勘估計各軍於明春凌汛後分段興作原以渾流

漲落不時向例霜降後始報安瀾屆期牽繩量度較有把握若勘估過早積潦未降道路難通且恐續有漫溢情形變遷未能作準該河道自夏至上汛駐防隨時分投督查搶險須待霜清撤防回署雖無四載行水之勞實非安坐行館可比容卽飭催其勉遵大旨早爲親往相度稟覆再行咨請酌核純農所部土壩已成似應略予休養

陵差期近直屬將吏奔走竭蹶之不遑淮練各營亦宜俟明春調令赴工心志乃可專壹匪獨水涸桑乾便於畚鍤也諸乞鑒原直屬交代疲玩經飭藩司嚴定章程非欠款清繳不得補署曹令壬泰積逋太多礙難以一人撓眾法旣蒙厚意矜恤當徐商之方伯未卜有法可設否執事得假休息自可剋期康復襄贊樞廷以慰眾望幸無再伸前請

致游子岱觀察

光緒七年閏七月二十九日

左爵相函催勘估永定下游工段昨已專檄飭催諒蒙鑒照頃又接二十七日緘稱王闔青等履勘上游宜建壩八處尙可圖成已屬其回營整備至王純農擬率親軍三哨弁勇一千四百餘名赴下游會辦俟涿州三合土隄苦蓋旬後畢事亦可移帳就工請速飭尊處將土方編審明確水平旣得深淺廣狹放之而準湘軍得以分段賦役距冰凍之期尙早自可從容助理若直省淮練各營現供

陵差不遑啟處祇須定議會辦或先或後正亦無妨等語是侯相與純農觀察之意必欲秋閒赴工則勘估不宜再遲務望執事督同廳汛及老練弁目卽日馳往南七八工以下按照前稟段落切實勘明如何擇要妥辦核計出土遠近土方若干湘軍約以千五

百人爲率准練各營以三千人爲率就人數分定段落約三箇月竣工詳晰具覆以憑核咨

陵差在邇弟將督率各軍沿途護衛勢不暇分隊就工洵如左相所云或先或後仍是會辦一事卽於來春歲役可耳再尊處勘估旣定似應就近函邀純農觀察單騎先往覆勘並妥籌移營興工事宜再行定議庶更詳慎尙希酌裁

復左相

光緒七年八月初七日

永定上游闡菁方伯勘定建壩八處重關疊鎖控扼渾流較乾隆間但建玲瓏一壩者勢力倍厚但使蓄洩得宜經久不壞當於全河機局有裨頃准大咨飭地方文武幫同照料已分行遵辦矣純農一軍旣擬秋涼移帳就工前屬游子岱卽日馳往南七八工以下切實勘估約照楚淮兩軍人數分定段落並令子岱就近函邀

純農先往覆勘定議計距封凍尙有兩月卽不能一氣呵成明春
凌汛後仍可補做至

陵差在邇直屬練軍分供道段護衛其在各海口礮臺者亦不便
遠行抽調是以疊次咨函均聲明須俟來春酌撥助役茲承諭會
辦一事或先或後各有不同未宜概論明恕察物欽感曷任該河
道先將段落分定明春敝軍限三箇月蒞事亦不誤汛漲之期也
執事龍馬精神終日不倦有少壯人所弗可及者卽腰腳不宜行
跪坐而論道無庸常川入直本有故事可援

朝廷眷注老成豈容肥遯幸勿爲再三之瀆鄒牧振岳口外墾荒
事宜亟待清理尊意准其暫往弟亦批令遵照曹令壬泰貧窘可
憐參追自應從緩

復曾劄剛星使

光緒七年八月初八日

栗誠懷才未遇中道摧折賴有賢兄擔荷家事其世兄重伯英年嗜學可卜爲遠到令器目前處境之豐嗇自不煩遠慮也沅丈自思臣繼逝老懷更益難堪前請開缺又蒙

賞三月假未知近日體氣果康復否或謂兩江需人峴帥

內召雪翁堅辭可冀量移亦未卜廷推及之否洋藥加稅釐一節

迄無定議馬建忠往晤香港印度兩督據其電信印督謂中國統

買洋藥大意可行官辦尤妙樂從無阻惟價數宜定及一年遞減

或五年通減箱數並三十五年限各節事關交涉宜公使商酌

此地難定等語該道卽日回津官辦公司殊多窒礙商辦亦難有

把握威使意在各海關稅釐並收聞可加至每箱九十兩香港燕

督昨過津晤談祇要威使及印督如何定議渠必協力幫助又謂

粵犯已允照交惟駐粵領事多方阻措赴京當再商威公又謂香

港設領事亦可商辦似與外部議論稍異謹以附聞海參歲設領事曾屬駐津俄酋轉商凱署使以爲可行其外部意見若何想有復信在途布策早晚回華一切均易商定碰快船途中尙順計秋節後可抵大沽瞬屆期滿傳言內意將派黎召民爲替人尙在未定召民頭暈肝病堅辭出洋英法俄三大國必須資望素優可資聯絡恐不免躊躇四顧耳

復李丹崖星使

光緒七年八月十七日

商訂第二鐵艦及驗收雷艇魚雷各節精詳周密綜覈無遺至爲欽佩第二艦造法工料程式尺寸與第一號絲毫不異惟左右水綫下最低處厚薄不同改用全鐵定價六百二十九萬七千五百馬克已據滬道錄報電信雖較第一艦略貴而監工匠首可歸原班兼辦尊處亦得就近稽查一切節目無須重複駁論所省實多

譯鈔合同想已在途前准總署函屬第一艦題名七月二十五日
曾電致十五字名曰定遠計早收到將來第二艦或即名曰鎮遠
何如又於閏七月初四日電致二十四生脫礮開春起運再電知
等語亮亦照辦矣第二艦付價日期仍望酌定咨明敝處並知照
滬道以便陸續先期籌匯庶無遲誤第一二號雷艇及魚雷二十
尾先後發運封河前到滬開河來津當再勘驗管輪精匠前飭薊
林電屬代雇並學習魚雷之生徒俱隨艇同來爲盼魏瀚所稱英
廠碰快船九病頗有見地未知過印度洋有無險阻約計月杪當
抵大沽仍俟隨時察商補救至尊論旅順口礮臺不甚穩妥似未
深悉北洋形勢渤澥乃一小海如葫蘆形旅順與登州相對僅百
二十里口內有塘可泊多船正葫蘆之頸也敵必經口外以達津
沽營口有險可扼視煙臺大凌灣之散漫無收束者迥殊異日北

洋水師總埠船塢均當在彼建置卽兩鐵艦亦宜駐泊軍火糧餉均須儲蓄乃可備緩急各國水師名將皆謂得地卓見獨不謂然何耶羅豐祿學有根柢當差甚勤

復丁稚璜宮保

光緒七年十一月十七日

鐵甲船款及淮軍協餉均蒙儘數籌解俾海防得以逐漸籌維非以天下爲己任者不能具此魄力豈獨鯁生感佩私情也左相請假回籍埽墓約開春赴金陵自云到任後另有辦法如銳意復淮鄂餉固有關係川鹽能否截止在農部之意原不欲其另變新章但此公好勝逞強難保不爲楚商所撻動事關數省大局究非可獨行其志望公與家兄合力謀之其必不可行者固無妨執簡而爭也洋務則由總署主持若變亂約章各使必從中撓瀆近屢晤談不但無鞭撻四夷之心抑且無經營海上之志外強中乾概可

知已洋藥一事總署現擬另議辦法不敢苟同貽誤政由中出彼亦無如之何尊患肝氣自因庶政煩勞老年人須常服補劑遇少不如意事度外置之則肝疾可漸平蜀中人情浮囂謗議似未盡息而謀國之忠誠任事之果毅實已深結
主知倚畀正殷比當力疾銷假以慰眾望劉鎮蒙飭赴任歧子惠
想履新在旗員中可爲和厚長者

復劉峴莊制軍

光緒七年十一月二十日

手示寵辱不驚措施如意時艱責重任事者豈能盡免人言雪帥
既不肯爲又於局外苛加指摘曾文正嘗謂其不達大體於斯
益信矣

朝廷知公可當大事若非左侯相再三求去無可位置則江左夷
吾必不能輕棄也左相威望才略自以外任爲宜近因年高精神

似稍散漫江南自文正創造規模可大可久諸賢接踵蕭規曹隨士民欽服公雖去官有日未便忽然於遠近皈依之誠望交替時詳告而諄勸之勿過更張爲幸舍親趙梓芳心地長厚弟常謂其粥粥無能不知雪帥何以見罪其於鄙人三十年患難至交無纖芥之隙片稿中似惡其人而波及親戚者未免顛倒過甚承公據實湔雪殊代感激政府中似亦知其屈抑矣琴西素有清望洵不可多得之人才若因承審命案註誤尤爲可惜昨已奉

旨解任能免餘罪尙賴保全招商局前案反覆推求實無吞使中金證據似須照總署奏覆會奏完結昨已咨商冰案乞早賜復以便敘稿該局屢招謗議尊處前糾自因傳聞未確想大君子與人爲善之心必無膠執也

致李丹崖星使

光緒七年十一月二十二日

昨接電報初八定遠艦出陽等字樣甚爲欣慰十月杪赫總稅司寄來阿摩士莊擬造新式鐵甲船節略三件據稱造法實屬盡善核其所論各節多中肯綮其船中置礮臺之鐵船與德廠現訂定遠等艦形式相仿惟略異者定遠長二百八十尺彼長二百尺闊六十尺彼寬五十尺入水十九尺彼二十一尺機器馬力五千餘彼馬力六千每小時行十四海里半彼可行十五海里水綫處十四寸鐵甲彼十寸礮臺處十二寸鐵甲彼九寸他處則未詳及臺內之礮四尊各三十零半生密答彼係後門二十六噸四尊首尾用二十一生密答礮各一尊彼則船面六十四噸礮五尊又有格林礮二尊置於鋼桅上我船所無也船底全作夾層彼則船底夾層外船幫亦有夾層與我船前後有中壁同否煤僅備緩行十日速行三日彼則緩行可兩月速行可八日夜定遠船礮價約三十

七萬鎊零彼船礮價則三十萬鎊相去遠甚至帶礮樓之鐵甲與左右前後置礮之兵船似與定遠等式不同每點鐘行十六海里船礮價五十萬鎊雖較貴而駛行甚速據稱歐洲各國尚未造有鐵甲船一點鐘行十六海里者是否乞詳細考訂赫德未將原圖寄到無從細核阿摩士莊本著名大廠先後代訂蚊快船十三隻價值不昂似甚要好寄來各項鐵甲造法欲將何處制勝何處爭奇指示大概彼再畫圖送酌未知尊處與該廠熟習否或將如何制勝爭奇之處詳確開示弟即轉屬赫德金登幹等轉致亦可附呈原函件祈迅速核定示知

復涂朗軒中丞

光緒七年十二月十九日

玉階尚無大過惟不滿於巨紳之口湘帥殊不易為我公德望政績久為彼都人士所欽頌駕輕就熟左右贊襄得人自可不勞而

理聞恪靖已於臘八日起程赴任過鄂尙有句留否家兄久有退
志詭言者爲卯金同鄉再圖報復媒孽多端致煩重臣覆按適老
母宿恙未愈已先請假懸系曷任洪琴西緣三牌樓命案解任昨
有人因原奏疑竇多端請另派大員勘審麟尙書薛侍郎遂承
命南下而峴帥函告供證確鑿未知是一是二琴翁能不罹重咎
否近日言路紛厖風波疊起可爲寒心潘牧青照開復雖奉
旨允聞部中仍須議駁殊費周張直豫晉均未得大雪冬陽不藏
亦可慮也

復丁稚璜宮保

光緒七年十二月二十二日

左公自謂到任後自有辦法其近名而多意氣政府同事靡不深
知若更張過驟銳意復淮不但川鄂必須力持農部亦斷不能順
手也法人久占越南六省又添造兵船欲由瀾滄江上通雲南曾

胡侯正與該外部辨爭蔭帥老景頹唐於修內禦外之政不甚著
力聞有以嗜好素重上陳致煩覆按若得與公同心協力者慎固
邊陲亦何慮外人之窺伺耶川鹽運銷漸旺庫儲當留有餘以備
緩急鄂生行當大用未能久於其事接手者恪遵成法定可措置
裕如

復李丹崖星使

光緒八年正月十八日

定遠於冬月八日出隴一切順利竇僚咸集是日電報當即接到
因在省未即電復也去冬既匯到六萬鎊前接示後又飭滬關接
續匯寄計可應付無誤惟屢請將按期預估兩號鐵艦付款備文
咨明以便轉飭籌辦論公事必應如此來示以驗收駛回各費難
以懸擬確數未能即咨但船礮各項已定之款久經議明儘可先
行咨報聲明驗收駛回等費俟估有約數再咨敝處亦即分起飭

遵此項重大事件不得僅以私函爲憑盼切盼切礮盤是否兼用
汽力人力鎮遠合同已否繕寄雷艇大礮裝子器等雇船運送天
津旅順日內當可運到鐵艦大字道遠轉寄不便望卽在洋酌辦
仲虎於臘初過晤於執事頗有違言均可不必深究惟據稱經辦
鐵船未暇專精料理僅以屬之閩廠年少學生此輩雖略諳西學
習氣頗深名曰在廠監造實未能事事考較設令該廠稍有偷減
造不如法則巨款可惜人言可虞等語仲虎與陳季同魏瀚等固
未淡洽而所論恐非無因鄙人於鐵艦一事獨力提倡籌款極艱
將來若造不如法議者必將蠶起此私衷所尤兢兢者乞執事隨
時督同各監工等認真考覈勿任嬉游敷衍蒙蔽草率免貽後悔
是爲至要該學生等雖相從多年切不可信之太深不加督責也
此閒實無精通製造之員可以派往不得不責成執事獨爲其難

幸諒之仲虎赴京度歲聞引

見似辦不成恐亦難免徧告廷僚耳

復張振軒制軍

光緒八年正月二十日

總署鈔寄臘杪面稿及唐廷庚馬復賁等海防來稟具徵籌畫精
密委任得人總署亦甚嘉佩唐道往順化見越王如何議論馬大
使查勘東京至保勝如何情形諒有續報祈隨時鈔示爲幸紅江
上游水淺灘多兵輪斷不能深入卽法人現有之鋼皮蚊船據稱
有百磅後膛大礮似喫水當不止二三尺馬力亦不能甚大若保
勝上游逐節淺灘勢難任意行駛法人不過張聲勢以冀嚇散土
匪耳西國用兵慎重必不孟浪越中北圻地勢大有可爲全在該
國辦理得法孱王恐未足與圖存或爲法人所賺則無如何矣然
粵西有黃桂蘭一軍自足固圍滇南爲紅江上源蔭帥前疏徒諉

過於日本此聞於大局之言儻竟一籌莫展或須易人而治廷議當有斟酌也鄂案先將藝芳褫職芝舫開缺並無實在劣迹左公蓋藉以立威月內外諒可奏結家兄處之坦然而官興冰冷如不去位亦將求去也老母服藥調理漸就痊可惟高年經此久病飲食未能多進精神未能如常焦慮曷極撫屏仍補惠潮極承照拂聖躬難遽康復銷差無期霞軒何時到省能暫署否温雲已暫留差委

復黎召民京卿

光緒八年正月二十三日

美國調回學生洋文洋語多已精熟惟洋氣既深華文太淺現撥歸後學堂有名師嚴立規矩似須三二年後水師稍入門徑乃可再派出洋頃接丹崖星使臘初來函以尊處電調鄭清濂回閩監造快船擬俟魏瀚由英回德卽令鄭生回閩惟兩鐵艦工程正緊

監驗一切需人欲將新派出洋之十生內選派數人往德襄助兼
資學習以省往返調遣之費並請奏明十生中在德學習者歸丹
崖專理在法學習者歸劄侯專理而以洋監督襄理之其文牘等
卽由兩使館兼辦無須另員省卻無限周折牽掣等語查前此學
生在洋劄侯來信頗有違言其在英法習藝而未令公使節制本
不甚妥是以此次續遣學生會摺內已奏明由曾李兩公使照料
劄侯少有脾氣與丹崖素不相能茲丹崖擬請在德在法者分歸
專理各有責成固不必再爲瀆奏似應由尊處主稿摺敝銜咨明
兩使照辦或加函奉商曲爲調停以期有濟德廠鐵艦以學習兼
監驗實不可少祈酌辦爲幸快船工程若何經費能否接濟呂文
經短勇過多僅予撤委已屬從寬各船管帶稍知儆否黎蕓齋坐
馭遠兵船赴日本函告該船機器屢壞屢修海道生疏由於平日

少令出洋之故各口兵船須令常行出洋游歷操演藉習風濤沙
綫庶臨事尙可得用似應由尊處咨商各督撫勉力爲之否則局
勢太散實可隱憂左相於西國水師竅要茫未有知恐未必大有
振作也肇興公司頭船抵英未知若何布置生意可立腳否招商
局近來甚爲興旺而左帥嘗其僅爲商人射利於
國家無益亦可謂闡於大局矣

復李丹崖星使

光緒八年五月二十八日

定遠艦須七月杪交收派劉步蟾等前往學習觀摩已於二月間
咨明總署未便中止該員聞於五月中旬起程比當至德皆昔隨
執事在洋肄習者而劉步蟾尤來咨所評品擊賞堪派管駕鐵艦
之人隸北洋數年屢經嚴切教誡近稍謹飭尊函述日意格語明
敏而輕躁恐易僨事該生輕躁誠所不免晤時望加訓迪提撕爲

要計六月杪抵德去驗駛之期不遠耗費似尙無多管輪管鑪之
弁隨船閱看登記其日記須回華繳核幸切屬照辦所雇德國船
主果係向帶鐵艦兼明魚雷之員性情和厚兼諳英語留華教習
甚爲有益劉步蟾每謂水師人才以英國爲最方欲訪求延訂如
德員熟習可靠或卽與商明妥訂合同總之一船不可雇用兩國
之人務祈大才酌定見示伏耳鏗仿造長百尺十八海里之雷艇
據云第二艦艙面規畫空地儘可附裝可省拆合及運費似屬一
舉兩得造兩艘爲費幾何乞預籌辦祇求雷艇合用省費尊處當
代作主張電屬薊林稟付價銀可耳仲虎在京難免謠誣僕曾密
告總署諒不爲動暫留一年專爲督造鐵艦望勉力圖成以副眾
望鴻章奔喪回里合葬之期須明年三月擬百日假滿仍續懇展
未知能奉准否

復張振軒制軍

光緒八年六月三十日

朝鮮民志未定圍使館殺傷數人阻擾公使各節皆違和約背公法者日本因我主持英美約事正深憤嫉忽生此意外波瀾予以口實既派兵船步隊前往雖似恫喝實有興師問罪之意眉叔二十二自滬來函是晚即附輪船北旋想已同丁兩亭帶船東渡矣相機調停自是不易辦法頃復奉二十四日

寄諭一道恭錄呈覽內有朝鮮王宮同時被劫

諭尊處調撥水陸兩軍前往等因查北洋僅超勇揚威威遠鎮海四船可撥正焦慮閒又接金陵函報滬道電稟調登瀛洲馭遠二船偕往具徵調度得宜惟朝事膠葛殊多亂黨當仍是去秋滋事之人既劫王宮內外交訁該王號令有所不行日人又乘勢逼迫誠恐星星之火浸成燎原此事似應分別辦理先令馬丁二君帶

兵船速往少作聲勢幫同朝鮮君臣彈壓緝拏魁首一面商勸日本員將勿遽動兵靜候緝匪嚴辦王宮被劫則非其君臣主使可知罪有專屬於該朝廷無與也並於修約各事無干未便藉此脅制致敗和局至調派陸軍尤須妥籌由陸則道路阻長雨水多滯轉運費艱由水則兵船裝載無多商船租雇費力或可號稱陸軍繼至先聲後實俟眉叔等到彼察看情勢再行稟辦計張虛聲則護衛親兵兩營小隊可矣若大舉有戰事惟銘軍在後路可調統將勇疏於謀似須添派稍有智略如吳殿元輩會同照料庶冀操縱合宜盛軍爲津防主隊人數較多未宜遠出鄙見商辦得法可無戰事仍是上年臺灣成樣耳兵難踰度英雄所見想亦大略相同裕中丞傳知之

諭尙未奉到鄙意初擬俟葬事辦竣再取進止今

中旨疊催而前咨王夔翁文內原有假滿後海上或有警報卽赴
津籌辦之語朝日紛爭雖未足云警報究於海防微有關係明知
大才籌畫悉合機宜卽鴻章前去亦斷無所增益

聖意殷盼豈敢漠視自食前言現與家兄等酌商候裕帥傳知到
後東瀛續信如何再行酌定粵中人來謂沅帥五月二十四由湘
登舟忽病發而止果爾則執事回任兩粵固在意中若無意南行
而鴻章被

詔迫趣終不免此行祇可專辦通商奉屈台旆駐省經理直督事
宜兄必力爲籌助無分畛域服制期內無再握譏篆之理千祈叩
須助我勿少諉卸平生風義所以酬知己慰友朋者庶其在此尊
患腹滯似由積溼秋涼必漸痊愈時事多艱二三同志當爲
國家鞠躬盡瘁也眉叔寄閱所擬中東通商章程大致甚妥清卿

函阻俄約陸路通商與朝議相同皆可隨機籌辦佩卿任性乖張似須撤回薊林軍械綜理不能遠離子久志趣甚好肯任此煩難否或謂旅順各工宜仿西洋局務章程將銀錢工程分兩人各有責成可防流弊徐仲虎工程當尙精核如能任勞或令專辦工而以子久綜覈銀錢出入及聯絡營務是否可行乞卽妥酌飭遵其有不妥應再變通悉聽卓裁鄙人絕無成見也聞王詩正賄賣鹽票已派員查辦金陵晚節欠香行百里半九十可畏哉

復孫蕙田讀學

光緒八年七月初二日

昨又堂妹丈至廬接奉四月二十一日手教猥以先慈之變重蒙唁慰殷拳寄賜輓聯哀榮逾格敬懸靈摩哀感無似細詢又堂世弟嘉禮告成函丈提挈回甌佳兒佳婦繞膝承歡神明倍增矍鑠欣頌莫名道遠未及聞知有闕慶賀至爲愧歉大二世弟文筆英

雋秋闈鑿戰定有好音拭目以俟鴻章見星南奔過金陵時不便
停輪走謁遇靈輦於大通攀號呼搶痛不欲生因偕家兄弟扶護
回里暫厝家廟朝夕伴守忽忽已踰卒哭擬卜兆有期再北旋應
詔頃以東鄰有警疊奉

廷旨催迫憂患之餘形神俱瘁豈復堪膺艱鉅畏此簡書彌增踧
踏萬不得已祇可墨縗從事俟明春相機乞假歸營窳少贖重
譽豈勝隱疚吾師垂塵勞人想亦爲之矜惻也三四世弟年華方
富正可勉圖上進尊意仿鄧高密分授一業欲其兼習西學夫西
學在他日必有實用惟門徑甚多要自語言文字入手津郡學堂
重在造就水師人材自十五至二十歲素習漢文質幹樸健者乃
得入選肄習五年後上輪船操演再令出洋學藝兩年備充管駕
及大二副之用西國以水師爲第一等入中華雖稍輕武然他日

輪船盛興將材難得亦必推重是途如閩中世家子弟入學堂者現皆有所成就其明證也其次兼習西學華英文法並精可充繙譯及參贊機器各局亦小用小效世弟如性情相近志趣不凡似不妨酌擇派往入堂肄業惟夫子裁之學堂規矩嚴謹較勝家塾亦不患沾染陋習也蘇伯廩經理滬釐頗有條緒當爲上游器許聞溫郡館穀不豐近況尙可支否能遠出就講席否

復張振軒制軍

光緒八年七月初四日

金允植二十一日致關道信所言情形不謬若李昞應復爲戎首該國王及世子存亡莫卜此事殊大棘手眉叔兩亭於二十六由煙臺東駛計二十七晚可抵仁川探明若何情形必有確報如亂未有已自應速派陸兵繼進前書僅就津軍設想茲尊意擬令筱軒酌帶所部應之更爲便捷靈整筱軒智略穩慎足可勝任先馳

赴津面商機宜可俟續報情形輕則先帶二營乘登瀛洲馭遠等
船分載前往卽甚緊急其餘四營陸續東渡未爲晚也金魚二員
謂陸師雖少亦可有戡定之道是斟酌情勢之言朝人無軍械而
膽怯一見王師知必崩角祈屬筱軒勿過持重耳子戡於淮部氣
類未孚此事但責令筱軒雨亭與眉叔相機商辦當能妥洽滹沱
新河最暢可無佗慮裁五至今未到愚兄弟擬捐萬金併津局萬
金交去皖災重於浙善後費多似浙之五千爲贅文也

致左相

光緒八年七月初五日

鴻章侍奉几筵忽忽已逾卒哭擬於明春擇期合窆方欲續請展
假連奉二十四二十九日

寄諭以朝鮮內亂情形危急趣令卽行起程赴津金革無避何敢
拘執遷延北洋已派水陸各軍先往查探若亂未有已又有日人

乘機構衅勢須斟酌續調一切兵餉機宜必須面商台端以圖合力共濟此閒秋水瀰漫苦無舟楫前坐操江輪船機器窳敝赴滬修理未回務懇執事於金陵現泊輪船內檄派大船一隻往裕溪口小輪船一隻往巢湖施口迎候拖帶感荷高誼豈有涯量
廷寄二道錄呈台覽

復吳筱軒軍門

光緒八年七月二十六日

公函計已達覽二十三到津接望日惠緘二十五日雨亭眉叔來詳詢一切敬審勞苦功多應機神速佩慰曷任日朝約款既經定議雖償款五十萬元嫌其稍多而朝鮮君臣自甘忍讓中國未便代為翻悔都監營亂軍勦散亂黨羽翼已孤王京內外人心當漸奠定現有貴部六營坐鎮彈壓嚴申紀律撫輯流亡兵力似已足用無須添調多營徒滋煩費振帥原擬以黃鎮護衛練兵三營應

命尅日東渡適鴻章過煙聞亂軍勦散日朝定約大局無虞議令
暫緩拔隊想執事公忠明恕必能默喻斯意也日朝和約第一款
二十日內朝鮮捕獲兇徒嚴究渠魁日本派員眼同究治等語我
軍如有續獲兇首應與朝鮮政府會訊明確再由朝自行知照日
本究辦庶與約款不背如日人意從寬大不欲深究則聽朝鮮自
爲而已日本業經議和斷無再啟衅端之理我更不必從旁生衅
花房等若回王京帶有護衛兵員我營應與之輯睦交道接禮儻
駐營相近易於生事不妨量移城外扼要訓練又聞我軍初到游
勇頗多滋擾殊爲令名之累似宜默查各營如有餘勇散人盡數
資遣商之雨亭派船送回免致逗留滋事營壘旣成務督令認真
操練格外整肅俾日人朝人潛生敬畏吾弟素講治軍定不河漢
斯言耳日本兵未撤盡貴部必不可凱旋尙希強忍鎮靜隨事相

機妥辦爲要李是應罪狀難定然攬權怙勢必不能遽准釋回昨
奉

旨令鴻章會同振帥訊究擬辦矣再閱金允植密信云亂軍皆四
散帶兵器變服出沒有結聚生事之機大軍一撤奇禍立至云云
朝鮮兵數本單然非兵無以立國亂黨魁首必須訪緝懲辦而脅
從之眾招集解散尤要恩威並用固結其心我軍一時斷難撤回
務望吾弟會商朝鮮政府設法維持如何保邦定亂之策庶免後
患兄已奏明大院君卽在中土安置以終餘年其黨聞知或能絕
望反正也

復吳清卿節使

光緒八年八月三十日

朝鮮之亂起於軍卒譁餉而國王本生父因致政失志唆令圍攻
王宮使館殺戮大臣實屬非常之變日人師出有名幸振帥密商

總署迅派水陸各營馳往援護誘致亂首李昆應剿捕餘黨日使
奪氣乃就款以歸鄙人在籍三奉

寄諭敦迫不得不冒暑就道航海北征迨抵津而事局倘有就緒
朝使陸續西來就商善後比亦少安貼矣日本索償兵費五十萬
元朝人甘受脅逼竟自畫諾雖悔奚追其愚弱殊爲可憫昨遵
旨籌議通商水陸章程已鈔咨冰案內變通甯古塔與慶源會甯
市易一節悉如尊意核辦異日會訂設立關卡一切妥章擬請執
事就近督同李秋亭察酌勘辦咨由敝處彙奏並移朝王知照爲
荷朝王咨請禮部轉奏刷還占種吉邊貧民恐俄人援例未知
廷旨若何彼頗欲治兵北道招徠逃人與吉邊犄角爲自強計但
已隸我籍與役屬俄人者未必肯還卓裁以爲何如俄界各溝華
民兩年內能否遷歸琿塔境內劃疆而守若越界保護勢必不能

俄人志在侵奪自未易與商也雙協領接統靖邊等營操法均歸一律旗員將材難得及時訓練可備他日干城之選機器局設在吉省尙能籌顧否煤礦開采何似念念鴻章明春擬乞假歸經營葬事少贖重誓

復李丹崖星使

光緒八年九月初九日

朝鮮內亂

廷旨敦促北來比抵津而朝鮮已大致就緒現商辦該國善後事
件水陸各營尙未卽撤前在英定購碰快船二隻此次赴援神速
頗資其力廷議有欲乘勢進圖日本責問球案者鄙意師船太單
鐵艦未到尙難跨海遠征且碰快船亦嫌稍小擬再籌款添製快
船二號屬赫德寄送圖說另單照鈔呈核其式係照前訂碰快船
礮加大約價銀十四萬鎊本日已發電請尊處速向英德各廠查

詢似此新式可否合宜抑另改何式價目若干想必費神諮度一切矣聞英新式快船有貴至二十數萬鎊者亦有其式較小而行亦速價亦甚廉者中國海面與鐵艦相依護究須用何項新式又定遠鎮遠兩艦在德定購英人頗滋疑怨添購快船似以英廠爲妥均希詳酌撮要電復爲幸北洋水師人才太少學堂甫設練船必須添備欲購合式夾板船各口甚少拍賣卽有亦貴約二三萬金電請尊處代爲留意或購現成或定做交商運貨來津留用尤便乞酌之昨奉七月初五日第七十九號手書慰悉種種應復各節條列如左

一六月二十九日電信舛錯太甚已飭電局報查

一魚雷教習果定派凱爾否雷橋浮埠應建何處自須俟教習到後相度妥商修雷廠儲雷棧必不可少蒙訂全廠器具已付價三

之一試雷急需者限三月造竣務早日起運亦俟教習度定地址
興建應與雷橋相近

一燐銅鍊法既准傳授執事一人自可預付五十六尾之定銀十
六萬一千三百馬昨已電致付定習法四字並加滿第三批字諒可
照辦凡配料下鑪看火錘鍊等法望費心習學務得其祕以銅質
不爽爲度中國既有學生匠首在廠習製各件再得鍊銅之法卽
可製全雷不必於百尾外添購用之不窮將來可令王筱雲專辦
此事斷不令洩漏於人

一定遠所帶次等魚雷二艇須速率十五海里半鎮遠附帶之百
尺魚雷二艇已否訂定定遠九月下旬工竣諒可剋日起旋望電
示北河十月二十外卽凍封似年底不便至大沽須明春驚蟄開
河後乃可抵沽口派員接收並預籌議布知海部派人代送能少

緩待否該廠既須保固派人在華接管滿期可無庸再糜保險巨費昨已電商上年碰快船來華赫德欲保險鄙人與丁提督葛雷森商定不允彼船小猶平穩況鐵艦之大又有德員駕駛者耶

一新式恩得生之電燈訂價三萬六百餘馬合銀五千九百六十餘兩定遠鎮遠艦內均宜購用惟電機器具須令前去員弁演習其法庶德弁回後可以運掉自如將來訂製快船內此項電燈魚雷箭連珠礮皆不可少之要件也

一此閒擬訂請英水師副將名琅者幫同丁提督教習總查北洋各兵船琅副將船學甚精歷練亦多人頗勤能知念併及徐仲虎自接兩次咨查頗自悔其失言幸勿計較坦然處之

復黎召民京卿

光緒八年九月二十八日

海上如練成大枝水軍益以鐵艦快船數艘南略西貢印度東臨

日本朝鮮聲威及遠自然覬覦潛消鄙人竊有志焉願執事之力
贊其成也承示估算快船工料價值較赫德所呈新式快船康邦
機器二副合五千馬力每一點鐘行十七海里者少差礮重二十
七噸此則大礮僅重十噸然彼索價至六十餘萬此則船礮約估
共三十九萬二千兩耳再四籌維似以省費合用爲是鄙意北洋
須添造快船兩隻尊處現造之船春初準可下水否再行續造約
計購料鳩工何時可以告竣又快船圖式乞先摹示一分以備參
考爲幸日兵駐王京護使館者尙有數百故敝處水陸各營派往
朝鮮未能遽撤以相牽制亟須運船一隻以便海道往來解送聞
永保琛航各船議准搭客收取船費貼補月不過數十金仍屬無
濟敢乞移緩救急酌撥琛航北來應用封河後卽赴煙臺亦甚便
也續到學生已交丁提督上船練習屈計碰快船及明春第一號

鐵艦到後尙有不敷調遣之勢懇勿撥回片於舊班學生中留意
挑選以供快船之需

復周筱棠京兆

光緒八年十二月十六日

權佐司農望實並茂惟譯署筆舌愈煩責任過重若卽真除卿貳
免以地方政事分心尙可力爲其難第自開辦洋務以後皆樞垣
首輔到署主持弟去秋在京曾爲恭邸蘭翁力言之邸謂苦勸不
行蘭謂習氣過重難於著手其實才短口訥不欲上前耳近聞有
欲調晉帥入主此席似係一人私見廣虞曾面言其不可輕重緩
急機宜非於斯事素有歷練恐至僨蹶或埃邸病假銷後再商措
置也巴使舉動橫甚聞明春卽將回國故恣睢逞忿以償土貨改
造之願該國外外部必不謂然自宜堅持定見力與磋磨迨其病歸
亦卽了事法越之事春閒賡虞過商料必以滇境准其通商爲結

局賡翁謂莫如在滇越之交覓一碼頭為安今寶使指稱保勝正
 與我輩私議相符然法人未必不欲我藉此移動劉永福而劉永
 福亦非中國所能移也嗣閱岑彥翁鈔摺唐炯建議可許入滇通
 商果爾則更無須此周折且看滇中覆奏何如法越原約已認法
 為保護今議北圻分界保護法人因我之屬國相讓但恐滇粵自
 度力量未肯多認一時難於定議耳英商設綫務望堅執不准上
 岸原議冀可廢然思返薦賢之疏鄙人不管疆事似應暫置勿論
 令叔裁五觀察在皖籌辦工賑極費心力而該處官場不免嫉忌
 壽翁或有以酬勞涑文數奇近日中風頗劇恐將半體麻木奈何
 令舅氏虧案前已緘屬品蓮和盤托出及早妥結再得尊函示意
 更當無疑能於執事任內斡旋尤妙但須詳告以寄籍也何天爵
 在此纏擾滬案日不暇給

復張蕢齋署副憲

光緒八年十二月十八日

前聞流言卽是公會避席惡聲憎影之類甚謂酒肆歇業街市蕭條皆言路擊射太過世態浮薄可厭公乃招忌之尤叨在心交不敢不告來教抑然自下佩慰莫名法越之約義何能諉屈計此事議論正長區畫極難周妥法已視越爲囊中物我出而牽制之總以永不吞滅爲要義保護之界過多卽彼可允從滇粵之力豈能長守境外稍有蠢動則責言旋至此界務之難也岑唐諸公稔知通商不能深入且前已許英不便獨斬法人而內意似不甚以商務爲然故彼欲在保勝我不置辨且俟滇議若何鄂生擬專賴劉永福禦敵法之調兵專爲永福孤注其何能久支不移永福則通商雖許而實未許法必加兵且爲邊患此商務之難也其中糾結頗多恐非剋日集議三月葬期已近私衷惶急頃已具疏預請

賞假實萬不容已之苦情若過期事猶未了當越紼以從也前致
振公以鞠躬盡瘁相責望來書仍謂必得請乃已欲徹處設法留
仲良真不解事仲良才力雖健絕不肯作此替人亦豈鄙人所敢
僂言哉釣臺本有陳情之意聞測信未知若何亮生適感寒疾屬
其勉赴期役渠恐與定夫意見不甚合又慮鄉宦客官與主人有
參差耳頃閱邸鈔鄂案已結家兄篤老已無宦情惟平生孝友忠
愛遠近尙無聞言太沖報復微嫌必欲深文周內若非
聖明俯鑒樞輔斡旋何能稍留體面殊令感激涕零不知所報楊
道人極忠厚亦無實在證狀以此見
朝廷賞罰之公平矣

致左相

光緒八年十二月二十日

創造機器織布之始因徇紳商公稟請委龔道壽圖駐局專辦官

務弟雖不深知龔道伊兄現任廣東臬司易圖曾切實面保似非毫無根柢者不料其稟託王克明等濟賊漏稅訊屬子虛既有此番形跡誠如尊示久留織局慮其終不相宜該道係蘇省屬員貴處尙不逕撤恐致外人造言簸弄何德愈高而心愈下耶已遵照大咨檄飭龔道另候差委毋庸會辦織布局務並咨覆冰案矣織局爲洋人所忌嫉而中國必須籌辦仍賴大力主持保護期於必成否則各商聞而解體事或中輟尤爲中外所竊笑也洋商紡紗公司並未停止總署雖極力辨爭各使以條約工作二字狡賴已辦者恐難諭禁但能杜漸防微勿任以機器推廣製造各種土貨庶可保華商利源耳

復倪豹岑中丞

光緒八年十二月二十四日

滇粵之出師也名爲防備土匪實欲牽制法人保我邊境是隱然

自認保護之意今法越相持日久不下法廷議院必欲添兵益餉以圖一逞劉永福終難孤注若中國不復過問恐其乘勝席卷北圻邊境亦有唇齒之患法使寶海欲從中調停實無他意故譯署與倣處因所請而允爲會商乃爲息事甯人經久之計譯署疊函及臘月初十日

寄諭奉到想尊處必妥細籌覆矣保勝爲通商總口是否相宜應由滇省主政核復則劉永福如何安置滇中當一併籌及彼所駐扼實當滇邊門戶也粵西祇應度量情勢能保護至越南何省何處爲止耳法人並未求與粵西通商則商務非粵所應管也論越爲中華屬國全境皆應歸中國保護此乃泰西通例然中國自古朝貢之邦不攙與其內政更無保護明文今越之南圻早爲法有駸駸蠶食而北若不趁此時劃定鴻溝設竟擾及邊界或如英之

於印度暹羅緬甸等處廣占內地爲患益長及今明立限制邊疆
可期永固而越土不至爲琉球之續越之利亦中國之利也至尊
慮異日或有要挾背盟之事我當專受其責此亦不可不防意者
但以近邊某處至某處爲保護之界繪圖貼說由譯署轉交會議
大臣與法使商辦可乎法已續調水陸兵若干至西貢專俟明春
會商中國定界後彼兵但派往所應巡防界內保護紅江通商蓋
同治十三年法越定約由紅江通商而久爲劉永福所阻決不甘
心執事切勿誤認此語爲彼族恫喝其咎固在越不在法也弟本
不欲與聞茲事無如譯署委令寶使赴津纏擾事關中外大局復
何所諉頃以營葬期近預請假歸奉

旨明正二月再定蓋寶使候該國來文正月可到必將

特派會商儻滇粵豫有成議法使不大費脣舌或可剋期定約尙

不誤三月啟窆負土之願則公私兼盡矣執事超擢專圻正隆倚畀自應勉爲其難何得遽萌退志皖鄉賑捐極蒙鳩助高誼可欽

復張蕢齋署副憲

光緒九年正月初七日

法人兵力不足取劉之說毋乃視劉永福太重而量法太輕爲一
丟里斯小國向屬土法遣水陸攻戰數年必滅之乃已劉則土寇
伎倆耳粵捻之役凡土寇聚結山谷者無不被賊攻陷粵捻尙無
根之賊法自恃強豈肯終爲劉所阻且同治十三年越王與法定
約通商紅江而劉獨持之若能永遠支拄中國亦願藉固邊防去
冬法廷正議大舉寶使恐與中國生衅從旁調停故鄙人迎其機
而導之允再會議至分界通商如何議辦仍請滇粵自行酌定屆
時妥商實非一味愼蕙也尊諭爭界則必扼北圻之隘彼南我北
各據一隅試問滇桂兵力餉力能遠略久支否旣與強國爲敵人

材果孰主張耶通商則必設西貢之官夫西貢久爲異域其魄力
幾在香港之上香港尙不准我設領事卽彼准設亦不過如出使
各國聽人主持我之兵船陸軍力量皆不能及庸有濟乎此事總
須參酌時勢大局而後定議未可徒逞氣矜之隆卽照滇桂所擬
尙恐不能成議若如尊論徒增波折終無結束遂於國計邊籌有
裨萬萬不敢信也僕將行之人本不應與斯議過承敦勛敢布區
區之誠蕤齋新議欲徇封貢虛名無當事理駁之極是家兄事極
蒙關照感不去懷仲良嫉惡最嚴豈有自染煙癖之理議者誣罔
殊不近情東平指日銷假當有措置

復吳清卿節使

光緒九年正月十四日

慶源會甯變通互市章程大致均甚周妥惟朝鮮旣派魚允中於
四月杪前往會勘此係兩國議訂之事須交朝員閱看商定恐屆

時彼此尙行添改未便遽以人

告彭部郎亦應由鼎帥主稿會奏派往昨已咨覆冰案並勅公函
奉商矣將來定章以後若令彭部郎駐會甯等處經理商務所需
經費似可酌照日本理事之例於出使經費內提支查日本駐神
戶長崎理事月各支薪水銀三百兩通事公役等項工食月各支
銀四十兩應否核減若干抑照原數聲請俟章程議定後由鼎帥
執事詳細酌擬咨由倣處核奏奉省同一變通互市而文山將軍
奏咨擬在中江交界地方設卡並未遣員往駐朝境或不至援照
且瀋陽財力較裕亦不似吉省之窘乏總署當可議准也俄人侵
佔琿春之黑頂子設兵招墾近在圖們江邊若不索還俄界竟與
朝鮮接壤後患殊多執事與俄官訂定三月照圖派員會勘交還
或無中變秋亭頃當赴琿籌商朝民祇可任其遷入俄境魚允中

到時應屬秋亭勸其不必向俄人收還或俟俄朝議約後再作區畫耳鴻章負土未成年前請假營葬奉

旨正二月再議目下法越會議之舉尙無端倪少遲當再申前請

春仲冀卽南歸也

復左相

光緒九年三月十六日

日前假旋急欲赴先慈小祥几筵晝夜趨程二十五夜四鼓過石頭城邊未及停棹修謁頃奉十一日手示敬承一一英國大東公司電綫必欲與丹國大北一律上岸實與同治九年原議相背總署與做處力拒其請正與尊意相符嗣劾剛疊次電商通融謂與現議洋藥加稅有益總署緘屬轉飭陸電華公司與英商相機妥議昨聞已訂合同未知英廷有無更改劾侯投餌之說用意雖是惟電綫利微煙稅利大以四兩博千金未必遂有把握承示致總

署緘放輕電綫歸重稅釐其中大有機權第威安瑪黠猶萬分恐仍不上鈞耳越南前請招商局輪船包運漕糧茲法人與越構兵又攻陷南定遂將商局所儲越糧查封蓋欲挾以圖越非與中國失和也然法國自春初外部易人因寶使擬與中國會議越事竟將該使撤回意殊叵測越南忽諸亦吾華肘腋之患聞已有旨令粵西徐方伯延旭出境布置此事如何結局尙望蓋籌及之潘鏡如在粵襄辦製造有年但粵東局面甚小不若滬甯規模之宏果有以善其後否李冕林操守端潔情形尙熟能否飭留百日後視事敬祈卓裁吳提督宏洛久在張振軒劉省三軍中張劉極稱其能戰適該營幫帶吳開勝來此祭奠面詢備細據稱二月閒營勇並未鼓譟似是曹肯堂所部之事至鈔單各項內號衣戰裙寒衣扣銀代製淮部各營向章皆同緣恐由勇自製未能一色整

齊其新勇入棚扣算接收號衣等項之價非月行剋扣入己也發米已改照時價扣餉挑河賞號均由營官照數分給並無分文未發等情所言是否確實尙希遴派公正妥員查究如有剋扣實據應請酌予參撤該部五營本係樹軍繼歸銘軍吳宏洛係原募之人資望較深接統似難得妥員也弟同家兄等經營窳窳少贖重誓他日出山再趨詣節轅一傾積愫

復左相

光緒九年三月十九日

上年法越啟衅曾奉

寄諭飭調閩粵兵輪交吳全美帶赴瓊州駐泊游奕交廣界上以壯聲援當由船政大臣與粵帥商調輪船四隻前往祇可稍作聲勢未足遽當大敵南北洋水師甚單似難遠役是以今春越南王派員赴津乞派舟師防護該國都城無以應之見在法人進占河

內南定均係沿海內江地方輪舟便於出入若由河內循紅江而上卽爲越之北圻山險叢雜法兵尙單似難深入

廷旨已令滇粵各軍相機進紮又由總署電屬劾剛責問法廷因何更議動兵或者懾我先聲漸歸和局鴻章在津時所聞

廟謨大略如此未知以後作何布置越之疲弱與朝鮮等而同治甲戌與法訂約背謬已甚又未能一一遵辦法人所以興問罪之師將來調停亦大不易也

復左相

光緒九年四月初五日

奉三月二十四日手示以上海織布局擬請推廣紡紗恐洋人藉口絮聒商令緩辦思深慮遠欽佩莫名洋商紡紗機局如已停止自應批駁免啟爭端若洋局並未遵停紡紗專爲織布之用或尙可以間執其口鴻章前奉

寄諭催回署任昨又奉派督辦越南事宜材幹任鉅如何能勝
諭旨應調何路兵勇著妥籌具奏查防禦法兵應撥熟習洋鎗礮
之隊敝部准軍向練後膛鎗礮擬調唐提督定奎吳宏洛所部十
五營現駐天津劉盛休銘軍十營該軍等皆係劉省三舊部戰陣
得力可合可分昨准大咨尊處亦經奉

旨籌撥務乞移緩就急慨允暫行借用江左勁旅如雲似尙不難
酌抽填紮江陰礮臺本無須五千人之多但有五六營替防可無
他慮弟將家事檢料辦畢便卽啟行屆時並懇賜借小輪船入湖
拖帶再謁晤面商一切

復左相

光緒九年五月初四日

前趨謁飮領雄談醉酒飽德拜別後恩恩乘輪晤石泉漕帥於下
關暢敘契闊殊歎相見之晚頃奉四月二十九日手書鈔示總署

彙錄劫侯電報此聞亦早奉到軍情且夕變遷四月十三日法兵
進攻中越宮劉永福之伏殲斃總兵以次九十餘人電報法廷舉
國大憤連日接電稱已添派鐵甲及兵船四隻陸軍三千赴越議
院准添兵費不限數目將圖大舉報復劫侯適赴俄賀升冕總署
奏奉

旨派令與法廷專議越事劫電堅辭但請邊軍混入越兵暗助前
日之戰似卽如此辦法若號召大軍聲罪致討顯露開衅之象亦
非

朝廷本意法新使脫利古前使寶海同時抵滬所議斷難就範擬
再相機觀變穩慎圖之籌調營勇一節現密飭准部添備鎗礮加
勁操練以埃調發隨時電商總署酌定進止如須明與法人爲難
餉事一惟我公是賴乞勿推諉是幸

復張香濤中丞

光緒九年五月初五日

手教並頒聯幃拳拳風誼矜恤良厚李鎮相遇於巢湖舟次當卽
挈令赴滬詢悉蓋躬過勞夜以繼日目前庶政就理歲豐人和宜
稍稍節蓄精神以爲遺大投艱之用海內人才虛耗極矣一有警
變不知如何支撐如公之年力學識真未易數數觀耳鴻章鴛弱
無似屢更事變志趣益復頽唐於軍國大政無所裨補昨歸負土
方擬續假閉廬藉以藏拙補過屬以越南事棘疊奉

廷旨催迫上道義無可辭往者日人之闐朝鮮赴機宜速今者法
人之圖越南調發宜緩蓋敵勢有強弱事理有糾葛也到滬後兩
晤法國新使據稱法越自甲戌立約後明認越爲自主之國不得
復爲中華屬邦昨因劉永福戰敗法軍國人大憤議院添撥兵費
遣水陸分批東下必欲得而甘心詢明中國或明幫或暗助卽將

失和等語頃已電達總署請轉奏以定進止內意初不過虛聲恫
喝冀法人斂兵復歸於和豈知法廷蓄意吞併在十年以前一旦
小挫使有藉口暫無調停轉圜之策各省海防兵單餉匱水師亦
未練成一發難收則決裂固意中事也法事與上年俄事又異俄
皇垂斃持盈保泰機有可乘法爲德挫十餘年養精蓄銳欲藉辱
小以逞強貪利恐中土未易與爭鋒上下力圖自彊生聚教訓庶
有振奮之一日耳

復左相

光緒九年五月十六日

粵西出境兵七千餘有徐方伯督統雲南出境兵六千餘有唐方
伯督統足爲越軍劉永福聲援法軍在河內南定者固守待援計
六七月間援師陸續可至儻越軍再接再厲勢必不能深入日來
劫候電報亦有紳會漸咎法廷開衅之語越事似有轉機前奉初

二日

密旨飭鴻章速回天津比因布置未定復疏上陳以待

後命再取進止尊農闈青兩軍本已面允隨征惟南行現未定局

似宜少緩調募即舊部淮軍亦未便遽爾檄調也滇粵邊境河道

甚少水雷無甚用處上年滇中奏撥鎗礮至今尙未專員領取可

否派員迅速解往尙希卓裁承允代濟餉需篤秉公忠欽感無似

疾續奉

廷旨當再奉聞

復張蕢齋署副憲

光緒九年五月二十日

法之蓄志圖越已數十年中朝向置不問至上年形象大著始與
力爭其何能及今又倉卒而起不才於禮廬隻手空拳不知所以
爲計若以淮部尙有兩萬則現駐要防豈易抽調若以鄙人素尙

知兵則白頭戍邊未免以珠彈雀樞府調度如此輕率殊爲寒心
聞有請恪靖南征者此老模糊顛倒爲江左官民所厭苦移置散
地固得矣然夷情大局懵然必有能發不能收之日事局方長尊
論選邊才儲戎備則經久不易之策耳鄙疏昨亦稍稍及之如蒙
交議或得寓目惟目今人才彫瘁將材邊材祇宜節取其長於愛
護之中加以磨勵求全責備則無能勝任者矣越王老悖無後無
可久存之理河內以南斷非我力所能圖存將來能照寶議劃存
北圻近邊一帶已爲幸事滇商不得不通究之通商非病通商而
辦理不得人則禍機潛伏也桂險而瘠實非彼族所垂涎敢保永
遠無失尊慮滇桂去而天下不可問危言悚聽無當事情期期不
敢諾也粵防宜用粵人但須統以淮湘之將乃漸東以紀律願少
留意鄙人爲局外浮言所困行止未能自決仍候

中旨遵辦局外論事事後論人大都務從苛刻孤忠耿耿祇自喻
耳蓉江事前已面屬鄂員轉商兩院將增付運腳六千兩逕解津
轅發道作爲油艙之用勿令胡道經手易帥後未知允否壽翁迄
未到滬當再商之

復周筱棠京兆

光緒九年六月十三日

法越近情疊詳電函可勿瀆陳築室道謀固無裨於機要懸想此
事結局實屬難之又難楊越翰密告脫使接該國密電將來賠款
兵費須著落中國代償稍一進兵勢必惹禍上身無論屬邦名分
難存且有糾纏不了之日劫剛自春徂夏電報似因法廷不理多
爲憤激之談而所擬新報解散各國勸說茫若捕風但冀秋後法
兵進攻仍不甚得手或者廢而思返我可乘機轉圜是則微天之
幸目前脫利古即使北來斷無成議其狡悍實倍於尋常也鴻章

甫拂征塵遽膺兼權督篆之

命傑然弁經豈堪蹈此咎戾頃已專疏瀝辭

復吳筱軒軍門

光緒九年九月初三日

接六月二十九日惠書商及暫留二營駐朝餘卽移回煙臺以顧
東防等因此事關係頗鉅躊躇月餘難遽定計久未作答八月二
十六日張哨官齋到中秋日來書復諄諄以孤軍遠戍易致流言
爲慮而於朝鮮近日情事概未詳及接晤張哨詢悉軍政嚴肅動
履綏和爲慰法越構兵日久未解七月杪法人與劉永福戰爭北
圻不利調兵船另攻順化都城脅定新約十三條盡攘其兵權利
權及用人之權並願將全國歸法保護越王名號土地雖存固已
陰降於法僅劉永福所部力與相持我滇桂各軍進紮越之北甯
山西與劉倚角援應殊非常局法使昨來津赴京會議求我助勦

劉團或退兵分界均未能許法亦有進退狼狽之勢聲稱仍添兵
攻劉或因我暗助劉月派兵船來擾沿海地方均難必其無事以
愚意揣之彼於劉團勢難中止或遇我邊軍交綏勝負尙不可知
必不肯遽爾入華開衅致擾亂各口各國通商大局內意不無震
動疊飭彭雪琴赴粵東會辦防務調吳清卿帶吉勇三千來津協
防並有如事勢緊急卽調貴部回津著鄙人妥籌辦理之說鄙見
此時布置總以鎮靜爲貴屈指兩月內北河封凍法兵船皆在越
南尙無移往粵閩大隊豈敢遽犯北洋且聞朝鮮君臣趨向不定
時時探詢越事似觀望以爲向背者大軍暫留鎮懾不可輕率舉
動致令屬藩藐視況太公餘黨誅索正急民情攜貳儻靡下舉足
內渡彼聞又起波瀾將若之何似目前宜靜而不宜動津防各軍
訓練精強卽使法船來擾當可力遏兇鋒至煙臺雖甚空虛卽貴

部全來亦未便守口或祇可近紮後路無大裨益也尊慮遠近訛傳市言成虎申報日報所稱多係日人嫉忌及朝人附日者捏造識者皆能鑒之無足計校張幼樵六月閒疏陳執事難於持久必不能銳然以朝事自任請飭敝處別選賢能等語敝部能任邊事者尙有賢能逾於麾下簡練逾於貴軍者耶是以迄今尙未復奏亦未轉行第念軍士久戍異域艱苦萬狀豈能一日愒置於懷擬俟明春開河後望台旆乘輪來津妥商進止或留二營駐守責成妥員而麾下先統四營回駐威海衛現操魚雷處所妥籌布置與水師相爲依附尙可立足威海衛亦足扼煙臺之吭尊意以爲何如朝鮮新練二營既有成效應否預擇漢將會統爲脫卸地步日本兵約定期年撤回已否抽撤竹添所言免西人挑衅敗中日之好殊非確論彼兵未撤我軍尤未便全撤竹使儻尙在朝晤時可

與要約幸勿盡洩情實於彼耳振帥帶吳宏洛五營赴粵籌防頗
露張皇之象其實法人未必真有窺擾徒令雪帥前往牽掣甚無
謂也鄙人駐津度歲照料防務音問可以常通

復張香濤中丞

光緒九年九月十二日

都司賈吉齡在熱河帶隊恩都護李軍門疊函諄留弟以尊處需
材孔亟促之西行昨過津面稟十年未經歸省求便道南宮原籍
小住旬日卽啟程比想已由籍過征其人老於戎行而澹於榮利
近頗習靜悟道未知尙能振作精神爲左右奮力馳驅否洋軍火
頭批計已解到二批本擬交賈都司領解因渠不便逕往如李鎮
先義復回可卽交解格林礮購到容卽飭撥籌辦旗兵屯墾原爲
本計遠圖直省情形與晉略同亦擬請作罷論津沽新開水田千
頃防營歲費資本甚巨開河濬渠多由勇丁力作旗兵習於偷惰

勢難強行吏部新改選章實多窒礙大疏已交議如能變通各省
受惠不少頃已飭司妥酌議詳剋日具奏或可趕入併議至州縣
丁憂起復後仍歸原省恐格於成例未易更移滬上探報已飭滬
津文報局速遞承詢法越之事所聞法船赴粵要素及兵船至津
沽皆係月前訛言法使來津議分界通商各節未就復往京未議
而歸國彼自恃脅越已立新約僅劉團未下似無多求於中國者
申報所傳法越約稿未詳昨見晉源洋報譯本鈔呈台覽雖未盡
確當已得其大概英使居閒法亦不願畢士馬謂德國調停有損
無益彼固以持盈保泰爲心未肯因人受累也昨南中電傳法帥
喉越與劉議和劉已退回山西未知確否劫剛來電法廷仍聳議
紳籌款添兵蓋劉不與和冬春法必進戰劉若暗和我軍尤宜防
備至與華開衅未必實有其事粵民焚洋房可徐就理烏合之眾

恐不足當勁敵清卿奉

旨帶吉勇三千來津聽候調撥封河前當到再商屯駐之所看來
越事實未易就範剛柔均難結束執事目營八表何以教之蕢齋
西去不便通問尊處常有消息否片詢鐵礦一節晉礦甲於天下
惟土法不精運道多阻是以遠商裹足前商局議用機器開鐵路
卽如尊旨由平定至小範四百餘里鑿山架橋連開礦工本計需
千萬以外華商斷無此財力若借洋債更駭聽聞近因法越事久
不定謠惑甚多滬粵市面大壞殷商歇業集股無資唐景星今春
往西洋采探礦務商務約歲杪乃回埃與籌商或令開平礦師就
近赴晉勘視稟請示遵鑄鐵機器鍋鑪均極笨重似不得過四天
門至鎔鍊成鋼陸運出境尙可將就但恐先不能仿洋法烹煉耳
敢貢所知以備決擇

復丁稚璜宮保

光緒九年九月二十四日

鴻章春暮假旋營葬嗣奉

詔督師越南倉猝成行駐滬彌月疏陳法人圖越已三十餘年動關全局祇可令滇粵各帥藉防邊爲名出師協守以固吾圉未便號召客軍大舉深入致成兵連禍結之象旋即疊奉

密諭迅回北洋復令兼權畿篆以不祥之身謬膺艱巨必召禍殃屢辭不獲而大水又至矣竭蹶經營昕夕尠暇負疚萬端捧閱手示似精采少遜往時所謂手輒神罷殆非虛語時艱日棘人才益孤惟賴三數君子分布海內支持危局明公才望識力軼羣絕倫老於邊陲猶非鄙人所願此身關係至重衰年病後以培補元氣爲要務祈稍節憂勞勉進補劑勩力仔肩萬無可退之日禱祝之餘彌殷悒系法人脅越訂新約二十七條盡攘其兵權利權及用

人之權越更不可爲國劉永福雖尙能戰法又挾越王以制之勢成孤注恐非常局滇軍先得地勢舒卷自如惟粵軍近臨河內徐曉山蹈厲無前旣不能爲越恢復將如羝羊觸藩深可危慮法使來津京恃越有成約不少俯就劫剛在巴黎屢議屢翻亦復無能爲力此事正不知如何結束耳

中朝若必爭屬土彼常有南犯粵東北闖津門之謠大約沿海防務一二年間總不可鬆勁蒙允籌濟淮餉不稍短解公忠厚誼欽感奚涯

復彭雪琴尙書

光緒九年十月十五日

夏閒滬濱捧袂暢聆蘭言別後南北分攜馳思不置聞奉赴粵會辦防務之

旨正系遠懷月之七日接讀重九夜手示娓娓數千言忠義勃發

擬卽單騎入粵先聲所播敵膽已寒調撥合字湘營及王道之春
所部聞有

寄諭飭左相照撥並源源濟餉諒無可辭頃江南人來詢稱該營
尙未起程豈尙靳而不予耶季老每謂粵可籌餉王朗青赴越南
之營且欲指粵捐接濟皆誤於梁檀浦臆度之詞粵雖富庶而紳
商志趣不一風鶴多驚尤虞紛擾若指捐輸濟餉恐望梅未可止
渴必賴江左協濟原餉庶無後艱粵人不乏勇悍可助聲勢若如
公言按陸軍規制操練嚴明紀律似亦未易辦到振帥抵任後已
略有布置得我公振臂一呼同心共濟當可不戰屈人幸勿過焦
急也沙面燬洋房之案尙未辦結各國紛紛猜疑日有謠詠目前
須鎮壓民心勿令妄動免致因風生火總署現商英德法美公派
一員會同華員查辦燬失房貨秉公議賠此案辦了先解彼族黨

羽再與法人專理越事庶頭緒不亂而衅端亦不至多開執事報
起程籌辦大略一疏月初已到政府諸公當早鑒悉目下駐節何
處規畫奚似望隨時詳晰示知以慰企念弟謬權畿篆兼顧海防
任重才輕時虞顛蹶所盼粵洋障此狂瀾使不北趨鯁生可藉藏
拙耳

復劉濬卿

光緒九年十月二十日

現辦八年分奏銷實存銀一百六十餘萬茲核尊示九月庫存三
十二萬有奇銀錢所是月報存八十二萬有奇九月內報解在途
者不知幾批若僅二十六日十萬一批未到共祇一百二十四萬
零卽連上年提存津所三十萬計之尙不及奏銷實存之數究係
因何舛誤望與銀錢所通盤核算見示爲幸在部中見淮軍存款
如是之多方詫餉源富足不知各營預借太多如津所存銀八十

二萬之內各軍借墊米價馬乾二十九萬零代放武毅慶軍又八
萬零僅存四十四萬有奇耳揚局想亦有借墊之項若兩處常有
存銀百五六十萬亦足備緩急不時之需矣況現增武毅粵餉盛
軍補足二成等款誠慮來日大難海上若有警變滬湘入款更不
可靠然籌防喫緊之際若遇閩不加一關恐無以維繫軍心各軍
照加赴粵五營斷不能於已加一關之外再加也湖北善後局已
決意停解無可如何漢關切勿放鬆各督銷局務望隨時加緊商
催爲幸廬城王謙齋尙辰苦求幫助祈於閒款內歲寄百金以調
其乏不能多也

復翁叔平宮保

光緒九年十二月十二日

鴻章憂患餘生適遭時艱謬權鉅任無所裨補悚疚萬分越事之
興尙冀迎刃而解息事甯人今則局勢屢更彼此皆騎虎難下自

不得不堅持以待機會然岑徐皆非能了事者仍在樞軸之相時
操縱耳若僅在越地塵兵利鈍無甚關係波及內地則各省強弱
不齊民窮財匱實大可虞幼樵英銳無匹曾叩以將來結局若何
固亦茫無把握我公憂國如家知必長慮卻顧也

致李蘭孫中堂

光緒九年十二月十五日

日前幼樵來晤詢悉碩畫盡勤忠誠蹇蹇欽跂莫名鴻章於越事
初不敢力主進取實見得各省戎備未盡精整或至一發難收今
山西挫退敵燄正張我軍已紮北甯洵如尊旨祇有增軍繕備壹
意堅持以待事機之轉黃桂蘭在淮部中向稱能守如糧械應手
似可堅忍堵拒彥卿招集新軍憑恃險阻尙可自立若令深入鏖
戰恐無把握法人志在略地通商無厭兵自退之理其於劫剛猜
嫌已深又難在巴黎講解此事將來如何收局仍不免重費紆籌

耳清卿練軍簡器實力講求堪膺疆寄似未便久置邊隅希將軍於兵事茫然能否遴員往助尙希卓裁鴻章謬權艱鉅適遭水災籌賑籌防竭蹶無似設有外侮勉督將士力圖捍衛以祈仰答宵旰勿貽知己羞而已

復張香濤中丞

光緒九年十二月二十八日

唐景星頃已回滬聞約有西洋礦師東來竅開河北上當與商遣開平係煤師非開鐵好手津滬贗鼎更多不敢濫薦醇邸亦擬於西山齋堂等處開煤鐵礦屬景星物色礦師但無股本事必難成平定距直尙近四門旣成坦蕩機器或能拆運容有善相者當資之入山以副諄屬海禁雖開必得鐵好價廉與洋產相埒乃可暢銷頃因製粗器飭局員在津市購晉鐵據稱較洋鐵並不賤豈陸運費本耶蓋洋鐵方圓大小板條恰如人意不獨質地純淨也

晉軍先用前門鎗俟操熟再購後膛此不易之法近幼樵在總署商令敝處代購克虜卜過山礮百尊哈乞開思毛瑟鎗各五千枝以備海防邊防各省借撥繳價惟皆極精緻之品有器而不善用與無器等振軒電稱粵將尙不知操用洋軍火何論滇桂恐各省大率類此遽與西兵敵利鈍殊無把握耳鄧光華開銅礦如有股可集自應試辦越事蒙舉數條見詢謹罄所知以對

一振帥以省防自任故有雪老屯瓊之議以分責任嗣長將軍等電請留雪帥駐省僅撥王之春楚勇二營駐瓊尊論省城穩固敵雖襲瓊必能逐而去之是重視彭而輕視法恐彭張無此力量內意既不欲彭遠去自應緩圖瓊防

一道員總兵以上有可屬大事而未見用者鄙意竟少愜心貴當之人空疏可愧大潛才氣陵轍一切但不欲輕出所部散在南北

若調集則餉不應手時事艱棘彼固深知不易強起

一閩中已特召厚庵未知行止若何臺灣劉道能辦土匪軍事布置未聞方略

一旅順礮臺一座甫成宋軍添募四營有警則斂快船入口水陸相依聊資控扼不敢謂足恃也

一法外部於劾侯嫌衅已深其言格格不入渠常駐倫敦固非得已法又不肯派專使來華相持日久如何了局

一英美日各邦果至法船深入似應申明公法局外不得接濟目下尙非其時

一岑彥帥月內可抵興化法軍聲言進圖北甯似尙圍而未攻且俟新兵添到看其如何舉動此時山北以南均爲法人堅守無論滇桂皆不能逕達順化

一清卿所部操練洋器甚精頗思及鋒而試未聞有東歸者見籌
議吉防替人尙未覆奏

再奉旨示以船事殷殷稱謝愧悚莫名聞鄂局諸道初頗作梗嗣
經敝處批咨亦遂遵辦頃接唐廷樞電復呈覽西洋鐵礦師三年
辛俸來回水腳須二萬金若由尊處專用卽令發電往邀否則僅
察勘可否大辦似不值先糜巨款或屆時令開平礦師往勘乞酌
示

復左相

光緒十年四月三十日

前稔

溫詔趨朝正深欣盼頃奉惠示敬悉蒲輪就道清江至濟一水可
通僅濟甯至德州陸路五站由德至津下水八站於高年調攝較
宜弟卽預令長龍坐船往德州迎候鈞駕並派流馬小輪船泝流

上駛以備沿途拖帶惟查衛河水涸之際深淺不一小輪喫水略深向未至德當能在滄州以上探水前進伺接行程舊雨重逢蘭言快挹尚祈在津盤桓數日俾得飫聆教益由津達通水程不過三日也

復岑彥卿宮保

光緒十年五月初五日

此次議款之速實因桂滇各軍潰退越事已無可爲法提督調集兵船欲攻奪臺灣雞籠煤礦福州船廠接濟煤械爲持久索費計正慮兵連禍結益難收拾

中旨密令鄙人維持和局乃敢冒不韙以成議解此困厄而局外清議挑斥多端夏間法另派正使巴德諾由越來議詳細款目必有饒舌然鴻章必任勞任謗不肯遽與決裂福使密告閏月間當往保勝勦逐劉永福茲大疏令黑旗分紮大灘目下暑瘴正盛大

灘以上小兵輪斷難上駛萬一冒險深入尊處切不可聲明滇軍
進扼致與原約調回邊界字樣相背也至第三款邊界運銷貨物
章程及應在何處添設關卡一時尙難定議容後再行布商或須
委員會勘詳確西國通例凡議商約稅則有數年始就緒者固無
傷和好耳法兵在越者雖據稱不遽撤回又有將撤一半之說望
時時確探飛示廷論紛紜茫無定見但款局已成祇要內外慎持
之執事似須久駐邊關控制一切

致曾沅浦宮保

光緒十年五月初九日

幼樵京卿奏設水師衙門請

特派重臣經畫一事昨奉電示此事關係重大意見必須相同往
返函商定妥再行會奏等因具仰老成謀國至意當經電復大略
先是幼樵在總署創發此議恭邸蘭相多躋之遂欲以茲事委之

鄙人實苦才力不及曾於二月十三日詳覆總署請仿東西各國之例在京添設海部或令不才襄助商摧嗣聞樞意不以爲然仍擬奏請在外設水師衙門正繕奏聞朝局忽更因而中止幼樵赴閩

召對時又奏奉

諭旨飭陳乃下南北洋先行會議俟覆奏後想仍飭樞譯會同戶部妥議也各省兵船散漫誠不可無以統壹之但非北洋所能遙制卽南洋兼管閩粵洋面亦恐鞭長莫及若在京設海部又無熟悉情事之人堪膺是任此建置之難各省防餉竭蹶斷難猝集千萬鉅款若如德日之制分年籌款逐漸添船俟海防少鬆略裁營勇或可勉力爲之兩張及吳陳兩會辦心精力果當願分贄斯役應否由執事及鄙人合力肩承謹鈔與總署往復函及譯德日創

立海部規模述略寄呈鑒核並乞詳晰指示以便敘摺會陳

復許星叔少司寇

光緒十年閏五月二十四日

內外局勢屢變皆出人意料之外賴公等持危扶顛幹濟艱鉅弟雖謗滿天下他日或猶得爲山野之幸民也越事已同破甑近復疊起波瀾震動沿海彼慾難饜我餉莫支愈久愈危亟宜設法收束蚊肩繇力其何以堪

致曾沅浦宮保

光緒十年六月初一日

昨奉電

旨授我公以全權赴滬議約艱鉅之任危急之秋非公不能解此紛難又得伯潛閣學與筱邨康侯會籌襄助千鈞一髮當漸轉圜馳系曷已從前簡約本係止兵草約多窒漏牽混之處物議繁興負疚滋甚不意又有諒山之戰致騰彼口以原約第二款卽行調

回邊界爲詞猶可說也然萬國公法遲延有因並非背約至福酋
臨行面稱限二十日四十日撤兵語近脅制當已斥駁並無公文
照會何足爲據疊經緘致總署並電屬李丹崖與法人再四辨爭
彼亦中阻茲將函稿二件鈔呈鈞核該酋謂諒山戰狀我先埋伏
動手而潘琴軒來電實係彼先開鎗礮送文胡弁尙未到津先將
三次電語奉覽以爲臨時駁辨證佐

復張樵野京卿

光緒十年六月初六日

法事掬定不意又起波瀾巴德諾舊充外部茹費理幕僚初尙欲
維持和局奈外部爲孤拔福祿諾等所聳持必動兵以索巨款沅
帥此行如略不鬆勁難保不卽開兵端馬尾船廠危於累卵幼樵
屢電尙盛稱軍威亦不自量之甚矣丹文憂憤成疾想見謀國苦
衷乞假靜養定可全愈執事值此時艱贊襄機要但冀焦頭爛額

救熄燎原中外蒙福不淺鴻章以叢謗之身祇有竭力修備捍禦疆圉若法人不添調陸軍北來計可扼其衝突耳煙臺無可防備東力亦不足制之萬一有事恐將據爲糧煤接濟之所遂令南北海道梗阻焦慮莫名總之和局翻一回更壞一回求如前約之粗疏而不可得矣使節瞬指英美亦須法事了結乃無內顧之虞

復周筱棠京兆

光緒十年六月初九日

法事變局實出意外初訂簡約因彼慨免兵費乘機速定其餘節目尙待後商幸奉電

旨允行乃畫諾後異議蠭起當軸搖惑自有洋務議約以來罕見之事福酋瀕行限期撤兵面加斥駁彼遂自用鉛筆將節略此條刪抹此亦彼族問答常事不必一一上聞且正值眾謗羣疑卽請亦必大碰迫彼兵逼近復請照約調回仍不准行固知必待責言

乃降

明諭中外交涉四十餘年仍蹈道咸朝令夕更覆轍由於舊人少而新政多也此後洋務更不能辦尊意俟此事了期引退鄙人必當肩隨但恐不肯鬆手耳法廷堅索賠卹卽再展限辨論必不空手而回以後詳約亦有萬辦不到之處誠如來示無論辦至何處均屬前功盡棄焦慮曷任獻縣滹沱新河實有裨畿南大局壽蘅於水道原委利害全未攷究專聽四十餘村災民偏論遽爲定案所擬添開八里橋引河六十餘里工大款巨而無甚利益子牙月關引河入海卻係老生常談但需百萬帑金民情地勢亦未盡順或俟彼任直督有此大力耳裁五經手各工須來春補完一時似難遠調容爲留意

復吳清卿副憲

光緒十年十二月初六日

此案皆爲朝事而起而日本初與朝鮮訂約時卽明認朝爲自主之國隱然不認朝爲我屬邦井上未行之先固請我華派全權便宣行事大臣卽是狡計若謂就此互議證明朝鮮自主也其意尙不僅在撤防營一節果派全權適中其計事更難辦今我處若卽若離之交但使朝日議定則本案已結當不至另生波瀾二十三日執事闖然入會微示以干預之意極得機勢井上竟飄然而返不一枉顧殊屬可恨頃將初四日

寄諭及是日總署來函節錄大略電由旅順袁道專船呈覽聞有奏摺送榆關轉遞守候

批回是否係請

旨回渡總署所屬朝王具表申謝及贈卹傷亡官兵二節本題中應有之義卹銀自可寬免或將死事者奏請祔祀吳筱軒朝鮮專

祠並為出力將士請獎方覺周到乞酌行之金玉均逃日井上雖
 允協擊未肯載明約內照公法則必不擊交如俄之庇匿白彥虎
 是也徐相兩穆麟德到日後恐其不敢啟齒未知朝王能另設法
 否死灰復燃殊堪慮慮至吳兆有等營久戍異域苦累可憐此時
 不便遽撤須俟事局大定再議換防該員弁等驚弓之鳥若台駕
 遄歸失所依倚方正祥一營及丁雨亭三船不得不暫時留駐明
 春察酌法事若有變動再行調回尊意以為何如王妃尚在然閔
 氏權勢已去若令大院君東旋能否於時局有裨該國君臣閭弱
 經兩次變亂不小是否有懲毖振奮之思望察酌代籌如大院回
 國不至另生他變且能密贊大計或令袁世凱密諷國王專疏籲

懇當蒙

朝廷鑒允耳

致徐孫麒星使

光緒十一年三月初五日

伊藤大使在津兩旬會議七次始將條約訂妥畫押我軍久戍朝鮮本無永遠不撤之理但日本因我未撤彼亦不敢遽撤積疑生衅轉成贅疣茲議彼此同撤或先或後決無食言至朝鮮去冬十月之變咎在竹添其後我將士亦有唐突伊藤云日民被我兵戕害七人尙無的確證據允爲戒飭營官查明兇手懲辦藉以了案亦持平之道茲將專條及照會稿鈔呈台覽俾與彼邦人士談論得有依據伊藤瀕行謂回國後卽另派妥員爲駐朝公使是亦內悔竹添之生事矣伊雖甚要好暫未議及球案緣議而未得辦法彼旣久據豈肯遽退若彼此半分亦非長局伊欲鄙人奉特派赴日便可相讓法事未了礙難分身伊藤治國才猷精敏如銀行鐵路章程望時與探討詳示爲盼

復許竹筠星使

光緒十一年五月初四日

數月來日法議約應接不暇音問罕通奉三月初八日手書敬審
一一申報謂執事近有黃門之戚果爾尙祈善自排遣丹崖抵港
爲香帥邀往粵省諮訪軍實日內計可北來移交各件敬乞費心
料理三艦電催開駛雇人購物頭緒甚繁昨接三十電五月下旬
開駛途用找價各費一接電音必當陸續匯寄約計七月閒可抵
津沽此閒接帶及教練之員尙未選定式百齡雖曾在德管駕小
船實非學堂出身來津數月閩廠管帶員弁皆有後言若照約委
帶鎮遠未卜能否得力丹崖誤聽人言妄加推許卽所雇各德弁
亦不盡有真實本領但尙可節取不似式百齡之夜郎自大耳包
烈現充武備學堂教習性情閒有出入兵法頗知根柢前爲家用
未全付欲藉興訟譯員調處預借薪銀了事其在德溢支之銀自

應算抵也肄業各生船政既議展留至本年夏秋極當照辦幼樵
前請辭去日意格彼願不領薪水始終其事尙有悃忱左相與裴
樾岑復商三屆出洋不日會奏擬請由英法出使大臣總理其事
劫侯卽須替回尊意是否仍令日酋經理容請電示遵照德商定
購造藥新器乞派妥員驗收法約已定以後通商劃界各事口舌
尙多譯示西事望隨時鈔寄

致陳茂南觀察

光緒十一年五月二十八日

前爲朝俄密約事專函交英兵船帶往久未得復正深懸系昨又
令劉薌林密寄兩電交海鏡齋遞計均達覽連日據日本榎本公
使英領事面稱朝鮮外務已照會各國以英踞巨文島一事請各
國公評相助俄參贊在朝要挾欲索佔一島各等情英據巨文島
一時必不肯退俄又藉端生心況若有朝俄密約予以口實此事

大費調停想朝臣必不敢遽許出租致啟俄日爭端前電不過徇英使之請姑爲代陳亦明知其不可行幸屬朝政府祕而勿宣爲要至朝俄果有密約先旣未派全權後亦未經批准按照公法應作廢紙俄卽狡很儘可據理堅持日本外務聞此事甚爲鼓譟昨與榎本密商令其轉達將來事變正未可知穆麟德罷斥後是否尙豫聞機事目下若何情形望確探詳示日本允同時全撤弁兵已否撤盡並示及漢城至釜山陸路五日可達各國有要事皆由釜山電局轉遞獨中國無一電報嗣後遇有重大機密要件應卽專足送釜山轉電查照商局電報新編用詩韻上下平爲一月按日照加字數每電以韻字冠首便知英兵船常往來仁川煙臺要函亦可託其轉寄金允植仍管統理事務否金宏集現作何官政府何人主持希一一詳報

致日本參議伊藤春畝

光緒十一年八月初九日

承惠各書冊因繙譯未齊未及細閱中華士大夫拘牽舊制欲求仿效一二而勢難遽成良可愧歎惟軍實舟師擬逐漸整練以圖自立此尙能自我爲政者也英人有謂橫濱銀行近有虧折疑其所言不實此事中土必須仿辦但慮立法不精籌款不足致有虛耗印刷局製品件件精巧歲需工本幾何獲利若干榷本公使過談欲知其詳茲有土物數事屬其帶呈察收聊寫區區之忱

復崧鎮青漕帥

光緒十一年九月二十九日

臨清至阿城建造鐵路運漕一節兄在京時適有延京卿茂條陳漕務請於黃水穿運處修壩建閘奉

懿旨飭與王大臣等一併會議稔知壩閘均無把握因將盛道鐵路接運說帖進呈

聖意及醇邸深以爲然故飭尊處與成陳二帥查勘定議將來果能興辦兄自應力爲主持派杏蓀督籌辦理部存洋款除購船外無二百萬之多可由外設法另借至各省運四十萬石似不可少蘇甯三十萬當能如數浙江無折色恐難遵籌湖廣江西能湊足否若無四十萬鐵路必虧本息是須先定米數及每石給路費三錢乃可議造鐵道倉廩須在路旁臨清舊廩斷難合用似須在估費二百萬內核辦無庸另籌由臨至通船隻東省必難獨任須直東合力籌雇天津剝船尙可勻濟此尙小節目也

寄諭中河水漫溢恐有沖決妨礙係孫萊山侍郎過慮告以洋匠節略言明近河處築基六尺未有漫水能至六尺以上者第恐雋臣少見多怪以輿情不順阻之其實此小鐵路能興南北運貨必旺地方必有起色尙祈大才通籌全局贊成斯舉亦百世之利也

克齋何日北來如有成議當派西洋妥幹監工再往覆估

復曾沅浦宮保

光緒十一年十月初五日

鴻章在京句留兩旬

召對五次敷陳時事愧無以仰贊高深與當軸意見不能盡合大抵

禧聖與醇邸銳意圖政欲力變從前媵婀虛飾之習而諸臣墨守舊規似不足振興亦不敢有所建白各省裁營局節餉贍京旗一節爲固本起見鄙意一時必辦不到

宸謨邸意必欲見惠於旗兵又不深悉外省拮据情形丹相則云自左公善將軍兩次帶隨員來神機營邸知薪賞太優謂各省浪費如此京旗匱乏如彼不可不省有餘以補不足鄙言公特優待內相非盡人逐事皆然卽樽節絲毫亦何能集得巨款丹云亦明

知之力爭之不敢不附會以成斯議且視各省覆奏如何耳卽此
一端可知體察時艱之非易矣海軍一事條陳極多皆以事權歸
一爲主鴻章事煩力憊屢辭不獲雖得兩邸主持而仍不名一錢
不得一將茫茫大海望洋悚懼吾文何以教之至台端靜鎮江左
措置周詳樞堂尙無異詞新勇裁汰若何餉力能較寬裕至以爲
念

復崧鎮青漕帥

光緒十一年十月二十五日

陶城埠至阿城河身十八里填實築高建路卽以東隄爲鐵路座
身似尙直捷臨黃堅築碼頭工程必大惟慮淤沙太深根柢不堅
未能經久黃流變遷無定亦須隨時遷移應俟王道查勘議覆再
由台端咨覆會奏請飭委員帶同洋匠覆勘定議始可興辦將來
覆勘祇須徹處遴派員匠前往與東省印委酌議可耳至鐵路準

造後除江南北漕數外如有不足另請湖廣江西湊集成數屆時
由執事斟酌擊銜會奏似又在後著矣

復張朗齋中丞

光緒十一年十一月十二日

知旌節卽將東指先移行隊暫紮琉璃河嚴寒地凍似不便築壘
或於巨鎮大店分屯來春再圖進拔台旆先赴東查勘黃河疏濬
機宜至煙臺久未布防法事起後當事僅於山後添營子健往勘
亦祇敷衍其說事定營裁更無過而問者將來如何酌辦似應預
籌大略俟履新後事權專屬始可次第布置惟東庫竭蹶日甚各
省協撥爲難卽論河工非有巨款莫辦農部能否應手耶稔知東
省熟悉河務以潘邠卿爲最昨汪柳門過談亟稱其能似宜奏調
隨往周歷履勘足資商榷

復曾劼剛襄侯

光緒十一年十二月初九日

阿摩士莊製造船礮著名英國通行快船祇有穹甲而無水綫及礮臺甲鴻章夙所稔知中國向無鐵甲船僅新購定遠鎮遠二艦丹崖習聞德海部士叻取議論快船蚊船皆以加甲爲妥故酌定濟遠之式又限於船身過小不能處處合宜遂叢眾謗及抵北洋試駛尙屬平穩雖不過速而較定鎮及前在阿廠定造之超勇揚威快船已過之無不及究竟多一礮臺並艙口立甲亦可冒充鐵艦也尊論英以穹甲爲主與德製提出穹甲中段傳之於外以爲水綫帶者得力亦異不能強入言一洵爲圓通無滯海軍甫設不妨並存其式他日駛行旣久利病自見再專擇其一推廣仿造可也驗工料闡生比已到否學業未精須人督率謝先任王世綬等如能考究精核或令督同監驗阿廠素頗公正然各國造船無不派監工料實慮匠役之偷減礮由克虜伯製架由阿製當不致齟

齟不合燐銅魚雷係德專家似應由竹筠一手經辦芝田於此事
向未究心專賴規畫定局渠當循辦尊體近復何如明春旋旆譯
署及海軍署均待贊襄主持艱鉅非異人任也越事稍定通商勘
界二端正在相持不決而緬事又起屢見電商譯署能識其大中
朝驚貢獻虛名分有巴磨新街之說恐滇帥無此遙制魄力耳西
藏通商朝議甚不謂然英慾無厭若能嚴立禁約似無不可朝鮮
巨文巒久踞不退俄人嘖有煩言謂華不催英退彼必分割朝鮮
他處公能力爭否韓政闇弱與越緬等尤東方根本之患外侮日
增兵餉日絀人才日稀雖有狠心辣手亦有行不去之時可爲浩
歎鴻章精力衰憊無能爲役責望過眾進退趨亟望旌節東歸
抵掌痛談藉匡不逮

復丁稚璜宮保

光緒十一年十二月十三日

年來軍事洋務蝟集卒卒無須臾暇久闕箋候頃奉九月二十七日惠書將有遂初之志竊念時事多艱西陲一隅全賴大才措拄聖明倚重老成必不允行尙祈爲國愛身永肩鉅任以慰中外之望法事搶攘年餘幸已憊定滇粵勘界通商現正分投籌議不至再起波瀾惟英人突攻緬甸踞有阿瓦又將議由騰越大理通商並有人藏游歷之舉滇中固應接不暇三數年後西川必將波及實恃公爲萬里長城也朝鮮政昏民弱俄日眈視其旁危如累卵尤爲根本切近之憂昨奉

命穆將軍赴東省練兵未必卽有實濟與法用兵未及一年洋債山積庫帑空虛農部銳意裁勇固無如何又慮伏莽四起內患與外侮迭乘更不知所以爲計耳鴻章力孱任重惟日兢兢近來精力大不如前而不敢乞退坐待顛蹶公其何以教之

復曾劄剛襲侯

光緒十二年正月十六日

海軍之役同舟共濟藉資贊襄鄙人方幸卸肩有期執事乃欲稱病避事受

恩深重祇可鞠躬盡瘁徐圖幹濟時艱耳法事平後各省須還洋債近二千萬海軍無可恃之餉尙未能多購巨艦將材尤乏欲仿英制萬分之什佰一時實辦不到甚盼及時采訪西國水師兵制以備他日逐漸振興公其有意乎印督銳志拓疆未必仍允朝貢卽分界八幕亦慮尙費唇舌滇粵邊患固無已時俄人覬覦朝鮮尤屬切近之災四方多故不務強兵變法而徒空言攘夷效未見而害已叢集矣

復曾劄剛襲侯

光緒十二年五月十二日

前接四月九日來電細閱英德局廠又赴黑海辭俄主須秋初乃

能起程回華當經電復嗣醇邸來津出海巡閱談次述及並未催
促早來必可逕過盛暑於尊體調攝尤宜比當乘暇游歷各廠見
聞日增回朝握晤計在中秋節後矣翹盼莫名承鈔示緬事往來
各電聆悉一一每與英使詢及僉云存祀萬辦不到進獻中國亦
不肯仍稱貢字

上意擬俟執事旋京詳商辦法近日歐署使交卸之前曾向譯署
稱已立教王不令管事與緬祀無干署置不論似英亦不著急聞
緬邊土司蠢動英復添兵進剿或俟此事辦竣再議善後睦鄰之
方耶快船勝鐵艦英法多持此說西海水深鐵艦得力亞洲海口
淤淺鐵艦過大實不相宜然快船喫水過深者亦多不能進口似
三四等快船行十七八海里能載魚雷戰巡皆便阿廠能包訂燐
銅魚雷價不見增洵爲兩便芝田接辦自可循照無誤方兒於泰

西文語粗通究未辦過交涉既經芝田奏調報罷後應令西行藉增歷練晉謁時務祈切實訓誨

復曾劄剛襲侯

光緒十二年五月二十日

展誦手示在五月中下旬起程似與前電意緩至秋初少異紅海一帶六七月炎風烈日熱不可耐洵於尊體調養瀛眷細弱不甚相宜惟聞靜臥數日便可平順過去吉人天相禱頌曷任造船合同既繕成冊是否能糖印數分咨送芝田於此事素未考核依據定章知無差誤竹篋昨商派員弁水手分赴英德駕駛回華自係正辦第此項人才必須由學堂出身少有歷練方敢畀以帶船出洋重任現船管駕正不敷用焉得大隊可遣恐須仍由該廠雇人包送臨時派數員隨同學習照料卓見以爲何如餉項竭蹶異常一時亦難添置執事莅滬後想須繞道金陵再行北上

復醇邸

光緒十二年五月二十二日

鈔咨接見各國公使四條準情酌理折衷至當可勝欽佩聞巴使正在糾邀各國遵行設再以迎送答拜等節相詢總署但援各國使初見親王通例折之彼自無詞望力持定見稍振

朝綱爲幸英新使華爾身過津談及深願與茲盛會昨法領事林椿云戈使甫去署使未來欲電促其北上隨眾進謁而以望塵不及爲慮亦可知以得見爲榮別無議論矣教堂撥給空地樊教士求較舊基爲多既無房屋似亦無甚顧惜敦約翰續信謂教皇查案京城南北東西四堂基皆

先帝賞給教皇之物彼可自主情願將北堂移換德瑾琳又電致敦轉商能略減價更見忠順容俟電覆奉聞教皇與各國主平等嗣後如續有國書誠如鈞諭宜以

國書報之俾示聯絡中土交涉之案教務最爲隱患教皇權令能
行教士必不敢無理取鬧則裨益遠矣

復吳薇隱觀察

光緒十二年七月二十日

尊意閩廠經費不足各省應添船隻悉令代製洵屬一舉兩得惟
北洋籌款之艱執事在津時實所親見今協款全提海署較往歲
更形拮据前在英德訂造四艘乃上年神機營所借洋債餘款頃
核計船價尙短百餘萬正在設法搜羅豈能更有餘力添製多船
耶姑就寄示快船圖飭法監工福禮士核閱據呈說帖似有未盡
精密之處照鈔附覽英德續訂之船速率雖不甚多而一則有水
綫帶鋼甲及鐵甲堡一則有穹甲保護船機尙可海戰此則速率
旣少載煤無幾如果定造須待妥酌雷艇三式估價與西洋略等
惟摺內稱須添機鑪製多艘方爲合算亦慮不能剋期應手耳

復徐孫麒星使

光緒十二年九月二十二日

長崎兵捕互鬪一案，盡畫周詳，欽佩無似。担文去已兩月，證供尙未審齊。是否日人有意稽延，令我多出訟師之費，抑担文藉詞多拖，時日多得薪資，想執事必屬參贊、理事等加緊催辦也。日來豫籌此案結局之法，適有委員伍廷芳精習西律，久在香港英刑司處讞案，令其條列以對，深合機宜。照鈔呈閱，委員會審後，如能在崎議結固佳，否則須如伊藤井上等原議，由執事在東京先與井上會商，再向伊藤剖論，如仍狡執，駐京鹽田必係一鼻孔出氣，卽總署暨鴻章與之商辦，恐亦無益。似可與外務言明，照西法通例，公請友邦公正大員評斷。調處諒彼無可推辭，英臬司連呢人極公允。昨屬英領事轉商英使，似無不可。日廷若不允服，彼亦可另請一員，或再由該二人公請一人評斷，則事無不諧矣。會審如詘

在我死傷過多無再賠銀之理即可漸漸拖宕不必費如許波瀾
層折總之以速審速辦爲妙担文等審畢應卽辭回英使及總稅
司等皆謂先須兩國自商辦不應延他國訟師小題大做也

李文忠公朋僚函稿卷二十一